

摘藻堂四庫全書薈要

史部

欽定四庫全書薈要

史部

舊唐書卷四十一

詳校官內閣侍讀孫球



欽定四庫全書蒼要卷四千九百五十七

史部

舊唐書卷四十一

後晉司空同中書門下平章事劉昫撰

志第二十一

地理四

劍南道東西道九  
嶺南道五管十

劍南道

成都府  
隋蜀郡武德元年改為益州置總管府管益

綿陵遂資雅嘉瀘戎會松翼雋南寧昆恭十七州益州  
領成都雒九隴耶雙流新津晉原青城陽安金水平泉  
玄武綿竹等十三縣又置唐隆導江二縣二年分置邛  
眉晉榮登五州屬總管府又置新都什邡二縣三年罷  
總管置西南道行臺仍分綿竹導江九隴三縣立濛州  
陽安金水平原三縣立簡州割玄武屬梓州又析置德  
陽新繁萬春三縣九年罷行臺置都督府督益綿簡嘉  
陵眉捷邛十州并督雋南會寧都督府貞觀二年廢濛



州之九隴綿竹導江來屬仍改萬春為溫江六年罷南  
寧都督更置戎州都督屬益州八年兼領南金州都督  
十年又督益綿簡嘉陵雅眉邛八州茂雋二都督十七  
年置蜀縣龍朔二年升為大都督府仍置廣都縣咸亨  
二年置金堂儀鳳二縣其年又置唐昌濛陽二縣垂拱  
三年分雒九隴等十三縣置彭蜀二州其年又置犀浦  
縣聖歷三年又置東陽縣天寶元年改益州為蜀郡依  
舊大都督府督劍南三十八郡十五載玄宗幸蜀駐蹕

成都至德二年十月駕廻西京改蜀郡為都府長史為  
尹又分為劍南東川西川各置節度使廣德元年黃門  
侍郎嚴武為成都尹復併東西川為一節度自崔寧鎮  
蜀後分為西川自後不改舊領縣十六戶十一萬七千  
八百八十九口七十四萬三百一十二漢朝蜀郡戶二  
十六萬八千二百七十口一百二十四萬天寶領縣十  
戶十六萬九百五十口九十二萬八千一百九十九在  
京師西南二千三百七十九里至東都三千二百一十

六里

成都

漢縣屬蜀郡漢朝成都一縣管戶一萬六千二

百五十六蜀三代之時西南夷國或臣或否至秦惠王

既霸西戎欲廣其地乃令其相張儀司馬錯伐蜀取其

地立漢中巴蜀三郡蜀王本都廣都之樊鄉張儀平蜀

後自赤里街移治於少城今州城是也蜀城張儀所築

華陽

貞觀十七年分成都縣置蜀縣在州郭下與

成都分理乾元元年二月改為華陽

新都 漢縣屬

廣漢郡 新繁 漢繁縣屬蜀郡劉禪時加新字 犀

浦 垂拱二年分成都縣置 雙流 漢廣都縣地屬

蜀郡隋置雙流縣 廣都 龍朔三年分雙流置取隋

舊名 郫 漢縣屬蜀郡隋置濠州大業省為郫縣

溫江 漢郫縣地魏蜀郡治於此隋為萬春縣貞觀元

年改為溫江 靈池 久視元年分蜀縣置東陽縣天

寶元年改為靈池

漢州上 垂拱二年分益州五縣置漢州天寶元年改

為德陽郡乾元元年復為漢州領縣五戶六萬九千五  
口三十萬八千二百三至京師二千二百里至東都三  
千一百一十六里

雒 漢縣屬廣漢郡後漢置益州治於雒晉置新都郡  
宋齊為廣漢郡垂拱二年置漢州皆治雒縣也 德陽

後周廢縣武德三年分雒置 什邡 漢縣屬廣漢

郡後周改為方寧武德三年改為什邡雍齒侯邑在縣  
北四十步 綿竹 漢縣屬廣漢郡隋開皇二年置晉

熙縣十八年又改為李永縣大業三年改為綿竹武德  
三年屬濛州州廢來屬之 金堂 咸亨二年分雒縣  
新都置屬益州垂拱二年來屬

彭州上 垂拱二年分益州四縣置彭州天寶元年改  
為濛陽郡乾元元年復為彭州領縣四戶五萬五千九  
百二十二口三十五萬七千三百八十七至京師二千  
三百三十九里至東都三千一百六十九里

九隴 州所治漢繁縣地宋置晉壽郡古城在縣西北

三里梁置東益州後魏為天水郡仍改為九隴初於縣  
東三里置濠州大業省武德三年復置濠州領九隴綿  
竹導江三縣置彭州之名也三縣置屬益州垂拱二年  
屬彭州長壽二年改為周昌神龍初復置濠陽儀  
鳳二年分九隴雒什邡三縣置屬益州垂拱三年來屬  
導江蜀置都安縣後周改為汶山武德元年改為  
盤龍尋改為導江三年割屬濠州廢屬益州舊治灌口  
城武德元年移治導江郡垂拱二年來屬

蜀州 垂拱二年分益州四縣置天寶元年改為唐安  
郡乾元元年復為蜀州也領縣四戶五萬六千五百七  
十七口三十九萬六百九十四至京師三千三百三十  
二里至東都三千一百七十二里

晉源 漢江源地屬蜀州李雄立江源郡晉改為多融  
縣又改為晉源鶴鳴山在西北十里 青城 漢江源  
縣地南齊置齊基縣後周改為青城山在西北三十二  
里舊青字加水開元十八年去水為青 唐安 本漢



江源縣地後魏於此立犍為郡及犍道縣隋省武德元年復置改為唐隆長壽二年為武隆先天元年改為唐安新津漢武陽縣屬犍為郡後周改為新津屬益州垂拱二年屬蜀州也

眉州上 隋眉山郡之通義縣武德二年割嘉州之通義丹稜洪雅青神南安五縣置眉州五年省南安貞觀元年置龍山縣天寶元年改為通義郡乾元元年復為眉州也舊領縣五戶三萬六千九口十六萬九千七百

五十五天寶戶四萬三千五百二十九口一十七萬五千二百五十六至京師二千五百五十里至東都三千二百八十九里

通義 後漢置通義屬齊通義郡梁改為青州後魏改為眉州後改通義為安洛又復通義隋初為廣尋改為通義武德元年於縣置唐眉州也 彭山 漢陽武縣地屬犍為晉於郡置西江陽郡後魏增置隆山郡以界內有鼎鼻山地形隆故也隋改為陵州隆山縣先天元

年改為彭山也 丹稜 本南齊二樂郡後周改為洪

雅縣隋改為丹稜屬嘉州武德二年來屬也 洪雅

後周洪雅鎮隋改為縣武德九年置犍州貞觀初廢屬

眉州也 青神 漢南安縣屬犍為郡縣臨青衣江西

魏置青衣縣本治思蒙水口武德八年移於今治屬眉  
州也

綿州上 隋金山郡武德元年改為綿州領巴西昌隆  
涪城魏城金山萬安神泉七縣三年分置顯武隴安文

義鹽泉四縣七年省金山縣貞觀元年又省文義舊領縣九戶四萬三千九百四口十九萬五千五百六十三天寶領縣九戶六萬五千六十六口二十六萬三千三百五十二至京師二千五百九里至東都三千二百五十九里

巴西 漢涪縣屬廣漢郡晉置梓郡西魏置潼州隋改為綿州煬帝改為金山郡隋改涪為巴西縣也 涪城 漢涪縣地東晉置始平郡後魏改為涪城及潼縣隋

改潼為涪城

昌明

漢涪縣地晉置漢昌縣後魏為

昌隆先天元年改為昌明舊有顯武縣神龍元年改為  
興聖開元二年廢併入昌明仍分巴西涪城萬安三縣  
地置興聖縣二十七年廢地各還本屬 魏城 隋置

羅江

漢涪縣地晉於梓潼水尾萬安故城置萬安

縣後魏置萬安郡隋廢天寶元年改萬安為羅江廉泉

讓水出縣北平地也

神泉

漢涪城地晉置西園縣

隋改為神泉以縣西泉能愈疾故也

鹽泉

武德三

年分涪城置也

龍安

隋金水縣武德三年復置改

為龍安 西昌

隋金山縣隋末廢永淳元年復置改

為西昌也

劍州 隋晉安郡武德元年改為始州領縣七聖歷二

年置劍門縣先天二年改始州為劍州天寶五年改為

普安郡乾元元年復為劍州也舊領縣七戶三萬六千

七百一十四口十九萬九十六天寶領縣八戶二萬三

千五百一十口一十萬四百五十至京師一千六百六

十二里至東都二千五百六十里

普安 漢梓潼縣廣漢郡治也宋置南安郡梁州又改

為安州西魏改為始州兼置普安郡武德三年復為始  
州皆治於普安也 黃安 梁分梓潼縣置梁安縣尋

改為黃安 永歸 隋分梓潼縣置 梓潼 漢縣蜀

先分廣漢置梓潼西魏改為潼川郡隋為梓潼縣後魏  
自涪縣移梓郡於今縣屬始州仍改郡為縣也 陰平

晉流人入蜀於縣置北陰平郡山北有十八隴山山

有隴十八也 武連 漢梓潼縣地宋置武都郡及下

辯縣又改下辯為武功後魏改為武連也 臨津 漢

梓潼縣地南齊置相厚縣隋改為臨津也 劍門 聖

歷二年分普安永歸陰平三縣地於方期驛城置劍門

縣界大劍山即梁山也其北三十里所有小劍山大劍

山有劍閣道三十里至劍處張載刻銘之所劍山東西

二百三十一里

梓州上 隋新城郡武德元年改為梓州領鄭射洪鹽



亭飛烏四縣三年又以益州玄武來屬四年又置永泰縣調露元年置銅山縣天寶元年改為梓潼郡乾元元年復為梓州乾元後分蜀為東西川梓州恒為東川節度使治所舊領縣七戶四萬五千九百二十九口二十四萬八千三百九十四天寶領縣八戶六萬一千八百二十四口二十四萬六千六百五十二至京師二千九百里至東都二千九百里

鄭 漢縣屬廣漢郡歷晉宋齊不改梁於縣置新州西

魏改為昌城郡隋改為梓州煬帝改為新城郡二城左  
帶潼水右挾中江鄰居水陸之要梓州所治以梓潼水  
為名也 射洪 漢鄆縣地後魏分置射洪縣婁縷灘  
東六里有射江語訛為洪 通泉 漢廣漢縣地乃隋  
縣也 玄武 漢底道縣屬蜀郡晉改為玄武武德元  
年屬益州三年割屬梓州也 鹽亭 漢廣漢縣地梁  
置鹽亭縣也 飛鳥 漢鄆縣地隋置飛鳥鎮又改為  
縣取飛鳥山為名也 永泰 武德四年分鹽亭武安

二縣置 銅山 調露元年分飛鳥二縣地置也

閬州 隋巴西郡武德元年改為隆州領閬中南部倉  
溪南充相如西水三城奉國儀隴大寅屬蓬州十縣其  
年又立辯丹思恭二縣四年以南充西水屬果州儀隴  
大寅屬蓬州又置新政七年又以奉國屬西平州還以  
奉國來屬又省思恭入閬中縣先天元年改為閬州天  
寶元年改為閬中郡乾元元年復為閬州舊領縣八戶  
三萬八千九百四十九口二十七萬三千五百四十三

今領縣九戶二萬五千五百八十八口十三萬二千一百九十二至京師一千九百一十五里至東都二千七百六十里

閬中 漢縣屬巴郡梁置北巴州西魏置隆州及盤龍郡煬帝改為巴郡武德為隆州皆治閬中閬水迂曲經郡三面故曰閬中隋為閬內也 晉安 漢閬中縣地梁置金匱二又為金遷郡隋省郡改為晉城武德改為晉安也 南部 後漢分閬中置充郡國縣屬巴郡又

分置南充國郡梁改為南充郡國隋改為南部也 蒼  
溪 後漢分宕渠置漢昌縣屬巴郡隋改漢昌為蒼溪  
也 西水 漢閬中縣地梁置掌夫城後周改為西水  
縣 奉國 後漢分閬中置武德七年屬西平州貞觀  
元年還屬隆州 新井 漢充國縣地武德元年分南  
部晉安二縣置界內有鹽井 新政 武德四年分南  
部相如兩縣置 岐坪 舊屬利州開元二十三年來  
屬也

果州中 隋巴西郡之南充縣武德四年割隆州之南充相如二縣置果州因果山為名又置西充郎池二縣天寶元年為南充郡乾元元年復為果州也舊領縣四戶一萬三千五百一十口七萬五千八百一十一天寶領縣六戶三萬三千九百四口八萬九千二百二十五至京師二千五百五十八里至東都三千四百二十三里

南充 漢安漢縣屬巴郡宋於安漢故城置南宕渠郡

隋改安漢為南充果山在縣南八里 相如 漢安漢  
縣地梁置梓潼郡周省郡立相如縣以縣城南二十里  
有相如故宅二相如坪有琴臺 流溪 開耀元年析  
南充縣於溪水側置也 西充 武德四年分南充置  
有西充山 郎池 武德四年分相如置 岳池 萬  
歲通天二年分南充相如二縣置初治思岳池開元二  
十年移治今所

遂州中 隋遂寧郡武德元年改為遂州領方義長江

青石三縣二年置總管府管遂梓資普四州貞觀罷總  
管十年復置都督督遂果普合四州十七年罷都督府  
天寶元年改為遂寧郡乾元元年復為遂州舊領縣三  
戶一萬二千九百七十七口六萬五千四百六十九天  
寶領縣五戶二萬五千六百三十二口十萬七千七百  
一十六至京師二千三百二十九里至東京三千一百  
六十六里

方義 漢廣縣屬廣漢郡宋置遂寧郡齊梁加東字後



周改東遂寧為遂州後魏改廣漢為方義 長江 東  
晉巴興縣魏改為長江舊治靈鷲山上元二年移治白  
桃川也 蓬溪 永淳元年分方義縣置唐興縣長壽  
二年改為武豐神龍初復景龍二年分唐興置唐安縣  
先天二年廢唐安縣移唐安廢縣置天寶元年改唐興  
為蓬溪也 青石 東晉興縣後魏改為始興隋改始  
興為青石以縣界有青石祠也 遂寧 景龍元年分  
置

普州中 隋資陽郡之安岳縣武德二年分資州之岳  
隆康居普慈四縣置普州三年又置樂至龍龕二縣天  
寶元年改為安樂郡乾元元年復為普州舊領縣六戶  
二萬五千八百四十口六萬七千三百二十天寶領縣  
四戶二萬五千六百九十三口七萬四千六百九十二  
至京師二千三百六十里至東都三千二百三里

安岳 漢犍為巴郡地資中牛鞞墊江三縣地李雄亂  
後為獠所據梁招撫之置普慈郡後周置普州隋省武

德二年復置安岳為治所安居後周柔剛縣屬安居郡  
隋改柔剛為安居柔剛山在縣東二十步舊治柔剛山  
天授二年移理張柵也 普康 後周永唐縣隋改為  
永康移治伏強城尋改為隆康先天元年改為普康也  
崇龕 後周隆龕城隋隆龕縣舊治整瀨川久視元  
年移治波羅川先天元年為崇龕隆龕山在縣西三里  
也

陵州中 隋隆山郡武德元年改為陵州領仁壽貴平

井研始建隆山五縣貞觀元年割隆山屬眉州天寶元年改為仁壽郡乾元元年復為陵州也舊領縣四戶一萬七千四百四十一口八萬一百一十天寶領縣五戶三萬四千七百二十八口一十萬一百二十八至京師二千五百一十里至東都三千四百八十四里

仁壽 漢武陽縣東境屬犍為郡晉置西城戍以為井防後魏平蜀改為晉寧縣後周置陵州以州南陵井為名隋改普寧為仁壽所治也 貴平 漢廣都縣之東

南地屬郡後魏置和仁郡仍立平井貴平可曇三縣舊  
治和仁城開元十四年移治祿川也 井研 漢武陽

縣地東晉置西陽郡魏置蒲亭縣隋改為井研武德四  
年自擁思范水移治今所也 始建 漢武置建始鎮

五年改鎮為始建縣舊治擁思水聖歷二年移置榮社  
山 籍 梁席郡一名漢陽成永徽四年分貴平置

資州上 隋資陽郡武德元年改為資州領盤石內江  
安岳普慈安居隆唐割大牢威遠屬榮州二年分安居

隆唐普慈安岳四縣屬普州貞觀四年置丹山縣天寶  
元年改為資陽郡乾元元年復為資州乾元二年正月  
分置昌尋廢也舊領縣八戶二萬九千三百四十七口  
十五萬二千一百三十九天寶戶二萬九千六百三十  
五口十萬二千七百七十五至京師二千五百六十里  
至東都三千五百一十里

盤石 漢資中縣屬犍為郡後周於今簡州陽安縣移  
資州於漢資中故城為治所仍改資中為盤石今州治

資陽 後周分資中置縣在資水之陽也 牛鞞

必

反

漢資中縣為盤地隋分置牛鞞縣漢有牛鞞縣屬

犍為郡此非也洛水一名牛鞞水 內江 漢資中縣

地後漢於中江水濱置漢安戍其年改為中江縣因其

北江乃云中隋改為內江漢安故城今縣治也 月山

資中地義寧二年置 龍水 資中地義寧二年置

銀山 資中地義寧二年置 丹山 資中地貞觀

四年置六年併入內江七年又置

榮州中 隋資陽郡之牢縣武德元年置榮州領大牢

威遠二縣貞觀二年置旭川婆日至如三縣二年割瀘  
州之隆越來屬三年自公井移州治大牢仍割嘉州資  
官來屬八年又割瀘州之和義來屬廢婆日至如越隆  
三縣永徽二年移州治旭川天寶元年改為和義郡乾  
元元年復為榮州舊領縣六戶一萬二千二百六十二  
口五萬六千六百一十四天寶戶五千六百三十九口  
一萬八千二十四至京師二千九百七十二里至東都



二千七百十九里

大牢 漢南安縣屬犍為郡隋置大牢鎮尋改為縣武  
德元年割資州之大牢威遠二縣於公井鎮置榮州取  
界內榮德山為名又改公井為縣六年自公井移州治  
於大牢縣也 公井 漢江陽縣屬犍為郡後周置公  
井鎮武德元年鎮置榮州改為公井縣貞觀六年治移  
於大牢也 威遠 漢安縣地屬犍為郡隋於舊威成  
置縣武德初屬資州其年割屬榮州也 旭川 貞觀

元年分大牢縣置資官漢南安地晉置資官縣武德初屬嘉州六年來屬和義漢安仁縣地隋置和義縣

簡州 隋蜀郡之陽安縣武德三年分益州置天寶元年改為陽安郡乾元元年復為簡州舊領縣三戶一萬三千八百五口七萬五千一百三十三天寶戶二萬三千六百六口十四萬三千一百九十至京師西南二千七百里至東都三千六百里

陽安 漢牛鞞縣屬犍為郡後魏置陽安縣又分陽安  
平泉資陽三縣置簡州取界內賴簡池為名 金水  
漢新都縣屬廣漢郡晉將朱齡石於東山立金水戍後  
魏立金水郡分置金水白年二縣隋改為金潤屬蜀郡  
武德初為金水三年屬簡州縣有金堂山 平泉 漢  
牛鞞縣地後魏置婆潤縣隋移縣治於賴黎池仍改為  
平泉縣縣之旁池湧泉故也

嘉州中 隋眉山郡武德元年改為嘉州領龍遊平羌

夾江義眉王津綏山通義洪雅丹稜青神南安五縣置  
眉州貞觀六年改資官屬榮州上元元年以戎州之犍  
為來屬天寶元年改為犍為郡乾元元年復為嘉州三  
月劍南節度使盧元裕請升為中都督府尋罷舊領縣  
六戶二萬五千八十五口七萬五千三百九十一天寶  
領縣八戶三萬四千二百八十九口九萬九千五百九  
十一至京師二千七百二十里至東都三千五百里  
龍遊 漢南安縣地屬犍為郡後周置平羌縣隋初為

峨眉縣又改為青衣縣隋伐陳時龍見於中江引舟乃改為龍遊縣也州臨大江為名 平羌 後周置也

峨眉 漢南安縣隋置峨眉縣取西山名也 夾江

漢南安縣地隋分龍遊平羌三縣於涇上置夾江縣今北八十里有夾江廢戍即涇上地也舊治涇上武德元年移於今治也 玉津 漢南安縣地隋置玉津縣江中出壁故也 綏山 隋招致生獠於榮樂城置綏山縣取旁山名也 羅目 麟德二年開生獠置沐州及

羅目縣上元三年俱廢儀鳳三年又置治沱和城屬嘉州如意元年又自我眉縣界移羅目治於今所也 犍

為 本漢都因山立名舊屬戎州上元元年改屬嘉州

邛州上 隋臨邛郡之依政縣武德元年割雅州之依

政臨邛蒲江火井五縣置邛州於依政縣三年又置安

仁縣顯慶三年移州治於臨邛天寶元年改為臨邛郡

乾元元年復為邛州舊領縣六戶一萬五千八百八十

六口七萬二千八百五十九天寶領縣七戶四萬二千

一百七口十九萬三百二十七在京師西南二千五百一十五里至東都三千三百七十一里

臨邛 漢縣屬蜀郡邛水出嚴道邛來山入青衣江故云臨邛晉於益州唐隆縣置臨邛縣後魏平蜀自唐隆移臨邛縣治於漢臨邛縣西立臨邛郡隋罷郡移臨邛縣於今所治有火井銅官山也 依政 秦蒲陽縣漢臨邛縣梁置邛州於蒲州領後魏改為蒲陽郡置依政縣隋改為臨邛郡治依政梁魏邛州在今縣西南二里

後周移治於今所後移治於臨邛 安仁 秦臨邛縣

地武德三年置安仁縣貞觀十七年廢咸亨初復置

大邑 咸亨二年分益州晉原縣置也 蒲江 漢臨

邛縣地後魏置廣定縣隋改為蒲江南枕蒲水故也

臨溪 後魏分臨邛縣置也 火井 漢臨邛縣地周

置火井鎮隋改鎮為縣也

雅州下都督府 隋臨邛郡武德元年改為雅州領嚴

道名山廬山依政臨邛蒲江臨溪蒙陽漢源火井長松



靈關楊啓嘉良大利陽山十六縣其年割依政臨邛蒲  
江臨溪火井五縣置邛州漢源陽山二縣置登州二年  
置榮經縣六年省嘉良楊啓大利靈關蒙陽長松六縣  
九年廢登州還以陽山漢源來屬貞觀二年又以陽山  
漢源屬雋州八年又置百丈縣永徽五年以雋州漢源  
來屬儀鳳四年置飛越大渡二縣大足元年又割漢源  
飛越二縣置黎州神龍三年廢黎州漢源飛越屬雅州  
開元三年又割二縣置黎州又置都督府天寶元年改

為廬山郡乾元元年復為雅州都督羈縻一十九州也  
舊領縣五戶一萬三百六十二口四萬一千七百二十  
三天寶戶一萬八百九十二口五萬四千四百一十九  
在京師西南二十七百二十三里至東都三千五百一  
里

嚴道 漢縣屬蜀郡晉末大亂夷獠據之後魏開生獠  
於此置蒙山郡領始陽蒙山二縣隋改始陽為嚴道蒙  
山為名山仁壽四年置雅州煬帝改為嚴道 廬山

漢嚴道地隋置廬山鎮又改為縣廬山在縣西北六十里章廬山下有山硤口開三丈長二百步俗呼為盧關關外即生獠也 名山 嚴道縣地魏置蒙山縣隋改為名山也 百丈 漢嚴道縣地在漢臨邛南百二十里有百丈山武德置百丈鎮貞觀八年改鎮為縣 榮經 漢嚴道縣地武德三年置榮經縣縣界有邛來山九折故銅山也

雅州都督一十九州並生羌生獠羈縻州無州縣

壽梁州

東石孔州

西石孔州

林波州

涉邛州

汶東州

金林州

費林州

徐渠州

會野州

雅州

中川州

鉗矢州

强鷄州

長臂州

楊常州

林燒州

當仁州

當馬州

皆天寶已前歲時貢奉屬雅州都督

黎州下

雅州之漢源縣太足元年割漢源飛越二縣

及雋州之陽山置黎州天寶元年改為洪源郡乾元元

年復為黎州領羈縻五十五州也領縣三戶一千七百三十一口七千六百七十八至京師二千九百五十里至東都三千七百里

漢源 越嶲郡之地隋漢源縣長安四年巡察使奏置黎州後使宋乾徽奏廢入雅州大足元年又置黎州神龍三年廢開元三年又置黎州取蜀南沈黎地為名州所治 飛越 儀鳳四年分漢源於飛越水置縣屬雅州大足元年屬黎州長安二年廢大渡縣併入神龍三

年屬雅州開元三年又屬黎州也 通望 舊陽山縣  
屬雋州大足元年屬黎州神龍二年又屬雋州開元元  
年卻屬黎州天寶元年改為通望也

黎州統制五十四州皆徼外生獠無州羈縻而已

羅巖州

索古州

秦上州

輒榮州

劇川州

合欽州

蓬口州

栢坡州

博盧州

明川州

朶股州

蓬矢州

大渡州

米川州

木屬州

河東州

諾祚州

甫嵐州

昌明州

歸化州

象川州

叢夏州

和良州

和都州

附樹州

東川州

上貴州

滑川州

比川州

吉川州

甫藁州

比地州

蒼榮州

野川州

邛陳州

貴林州

護川州

牒琮州

浪彌州

郎郭州

上欽州

時蓬州

儼馬州

檄查州

邛川州

護邛州

脚川州

開望州

上蓬州

北蓬州

剝重州

久護州

瑤劍州

明昌州

瀘州下都督府

隋瀘川郡武德元年改為瀘州領富

井江安綿水合江來鳳和義七縣武德三年置總管府

一州九年省來鳳貞觀元年置思隸思逢施陽三縣仍

置涇南縣又省施陽縣十三年省思隸思逢二縣十七

年置溱珍二州儀鳳二年又置晏納奉浙鞏薛六州載

初二年置州天授元年置思吳州久視元年置清州二



年罷州並屬瀘州都督凡十州天寶元年改為瀘川郡  
依舊都督乾元元年復為瀘州舊領縣六戶一萬九千  
一百一十六口六萬六千八百二十八天寶戶一萬六  
千五百九十四口六萬五千七百一十一在京師西南  
三千三百里至東都四千一百九十六里

瀘川 漢江陽縣地屬犍為郡梁置瀘川故以江陽為  
瀘川縣州所治也 富義 隋富世縣貞觀二十三年  
改為富義縣界有富世鹽井井深二百五十尺以達鹽

泉俗呼玉女泉以其井出鹽最多人獲厚利故云富世  
江安 漢陽縣地晉時生獠攻郡破之又置漢安縣  
隋改為江安也 合江 漢江符縣地屬犍為郡晉置  
安樂縣後周改為合江也 綿水 漢江陽縣地晉置  
綿水縣當綿水入江之口也 涇南 貞觀八年分瀘  
川置在涇水之南

瀘州都督十州皆招撫夷獠置無戶口道里羈縻州

納州 儀鳳二年開山洞置天寶元年改為都寧郡乾

元元年復為納州領縣八並與州同置

羅圍

播羅

施陽

都寧

羅當

羅藍

都關

胡茂

薛州 儀鳳二年招生獠置天寶元年改為黃池郡乾

元元年復為薛州也領縣三與州同置 枝江 黃池

播陵

晏州 儀鳳二年開山洞置天寶改為羅陽郡乾元元  
年復為晏州也領縣七與州同置 思義 柯陰 新

賓 扶來 思晏 多岡 羅陽

鞏州 儀鳳二年開山洞置天寶改為因忠郡乾元元  
年復為鞏州也領縣四與州同置 多樓 波員 比  
求 播郎

順州 載初二年置領縣五與州同置 曲水 順山  
靈巖 來猿 龍池

奉州 儀鳳二年置領縣三與州同置 柯理 柯巴  
羅蓬

思義州 天授三年置領縣二與州同置 多溪 洛溪

龍州 大足元年置領縣四與州同置 寧 來銀

菊池 猿山

涪州 久視元年置領縣四與州同置 新定 涪川

固城 居牢

浙州 儀鳳二年置領縣四與州同置 浙源 越賓

洛川 鱗山

茂州都督府 隋汶山郡武德元年改為會州領汶山  
北山汶川左封通化翼斜交州翼水九縣其年割翼斜  
左封翼水三縣置翼州以交川屬松州三年置總管府  
管會翼二州四年改為南會州七年改為都督府督南  
會翼向維州窮炎徹笮十州貞觀八年改為茂州以郡  
界茂濕山為名仍置石泉縣天寶元年改為通化郡乾  
元元年復為茂州也舊領縣四戶三千三百八十六口  
五萬三千七百六十一天寶戶二千五百一十口一萬

三千二百四十二至京師西南二千七百九十四里至東都三千一十四里

汶山 漢汶江縣屬蜀郡故城在今縣北二里舊驪冉地晉汶山郡宋廣陽縣周為汶州置汶山縣隋初改為蜀州又改為會州貞觀八年改為茂州汶川 漢綿虎縣地屬蜀郡晉置汶川縣後周移汶川於廣陽縣齊州置即今治也玉壘山在縣東北四里石鈕山亦在縣界永徽二年廢汶川縣併入石泉 漢岷山縣屬蜀

郡貞觀八年置石泉縣也 通化 漢廣柔縣地屬蜀  
郡後周置石門鎮隋改為金山鎮尋改為通化也  
茂州都督府羈縻州十維翼兩州後進為正州相次為  
正者七今附於都督之下

翼州下 隋汶山郡之翼斜縣武德元年分置翼州六  
年自左封移州治於翼斜咸亨三年置都督府移就悉  
州城内上元二年罷都督舊領縣移還舊治天寶元年  
改為臨翼郡乾元元年復為翼州也舊領縣三戶一千



六百二口三千八百九十八天寶領縣二戶七百一十一口三千六百一十八在京師西南二千九百三十里至東都三千二百七十八里

衛山 漢蠡陵縣屬蜀郡故城在縣西有蠡陵山隋改為翼斜縣治七項城貞觀十七年移治七里溪天寶元年改為衛山 翼水 漢蠡陵縣隋置翼水縣也 雞川 昭德二縣開生獠新置

維州下 武德元年白苟羌降附乃於姜維故城置維

州領金川定廉二縣貞觀元年羌叛州縣俱罷二年生  
羌首領芷占者請夷復立維州移治於姜維城東始屬  
茂州為羈縻州麟德二年進為正州尋叛羌降為羈縻  
州垂拱三年又為正州天寶元年改為維川郡乾元元  
年復為維州上元元年後河西隴右州縣皆陷吐蕃贊  
普更欲圖蜀川累急攻維州不下乃以婦人嫁維州門  
者二十年中生二子及蕃兵攻城二子內應城遂陷吐  
蕃得之號無憂城累入兵寇擾西川韋臯在蜀二十年

收復不遂至大中末杜悰鎮蜀維州首領內附方復隸  
西川舊領縣三戶二千一百四十二無口天寶領縣二  
戶二千一百七十九口三千一百九十八至京師二千  
八百三十里至東都三千五百六十三里

薛城 漢已前徼外羌冉駝之地蜀劉禪時蜀將姜維  
馬忠等討汶山叛羌即此地也今州城即姜維故壘也  
隋初蜀師討叛羌於其地置薛城戍大業末又沒於羌  
武德七年白苟羌酋鄧賢佐內附乃於姜維城置維州

領金川定廉二縣貞觀元年賢佐叛罷郡縣三年左上  
封生羌酋董屈占等舉族內附復置維州及二縣薛城  
在州西南二百步也 小封 咸亨二年刺史董弄招  
慰生羌置也

塗州下 武德元年臨塗羌歸附置塗州領端源婆覽  
二縣貞觀二年州縣俱省五年又分茂州之端源戍置  
塗州也領縣三與州同置 端源 臨塗 悉憐 戶  
二千三百三十四口四千二百六十一至京師西南二

千六百八十九里

炎州下 貞觀五年六羌歸附置西封州八年改為炎  
州領縣三與州同置 大封 慕仙 義川 戶五千  
七百無口數在京師西南三千三百七十六里

徹州下 貞觀五年西羌首領董調貞歸化置領縣三  
與州同置 文徹 俄耳 文進 戶三千五百無口  
數在京師西南三千四百一十八里

向州下 貞觀五年生羌歸化置也領縣三與州同置

貝左 向貳 戶一千六百二口三千八百九十八在京師西南二千八百六十九里

冉州下 本徼外斂才羌地貞觀五年置西冉州九年去西字領縣四與州同置 冉山 磨山 玉溪 金水 戶一千三百七十無口在京師西南三千七百三十九里

穹州下 貞觀五年生羌歸附置西博州八年改為穹州領縣五與州同置戶三千四百三十六無口在京師

西南三千二百六十七里

笮州下 貞觀七年白苟羌降附置西恭州八年改為  
笮州也領縣三與州同置 遂都 亭勸 北思 無  
口戶在京師西南二千九百四十五里 右九州皆屬  
茂州都督永徽後又析為三十一州今不錄

戎州中都督府 隋捷為郡武德元年改為戎州領犍  
道捷為南溪開邊邠鄔五縣貞觀四年以開邊屬南  
通州六州置都督府督戎郎昆曲協黎盤魯鈞髡尹

匡衷宗靡姚徽十七州八年置撫來縣仍改南通州為  
賢州以開邊來屬天寶元年改為南溪郡依舊都督羈  
縻三十六州一百三十七縣並荒梗無戶口乾元元年  
復為戎州舊領縣六戶三萬一千六百七十口六萬一  
千二十六天寶領縣五戶四千三百五十九口一萬六  
千三百七十五在京師西南三千一百四里至東都四  
千四百八十里

夔道 漢縣犍為郡治所故夔侯國梁置戎州也 南



溪 漢南廣縣屬犍為郡後周於廢郡置南武成隋改  
龍源戍又置為南溪縣也 義賓 本漢南安縣屬犍  
為郡隋改為郁郾縣治天寶元年改為義賓 開邊  
漢犍道地隋置開邊縣也 歸順 聖歷二年分郁郾縣  
置以處生獠也

協州下 隋犍為郡之地古夜郎侯國武德元年開南  
中置也領縣三與州同置 東安 西安 湖津 領戶  
三百二十九在京師西南四千里北接戎州

曲州下 武德元年開南中置恭州八年改為曲州領  
縣二與州同置 朱提 武德元年置安上縣七年改  
為朱提 唐興 領戶一千九十四在京師西南四  
千三百三十里北接協州

郎州下 武德元年開南中置南寧州乃立味同樂升  
麻同起新豐隴隄泉麻梁水降九縣武德四年置總管  
府管南寧恭協昆尹曾姚西濮西宋九州五年罷總管  
其年冬復置寄治益州七年改為都督督西寧豫西利

南雲磨南籠七州并前九州合十六州仍割南寧州之  
降縣屬西寧州八年自益州移都督於今治貞觀六年  
罷都督置刺史八年改南寧為郎州也領縣七 味

隋廢同樂縣武德元年復置改名 同樂 升麻 同  
起 新豐 隴隄 泉麻 並與州同置戶六千九百  
四十二在京師西南五千六百七十里北接曲州

昆州下 漢益州郡地武德初招慰置領縣四與州同  
置 益寧 普寧 有滇池周三百里 安寧 秦藏

漢縣領戶一千二百六十七在京師西南五千三百七十里北接舊州

盤州下武德七年開置西平州貞觀八年改為盤州  
領縣三與州同置附庸平夷盤水即舊興古  
郡也領戶一千九百六十在京師西南五千三十里  
北接郎州南接交州

黎州下武德七年析南寧州置西寧州貞觀八年改  
為黎州領縣二二縣本屬南寧梁水絳領戶一

千至京師無里數北接昆州

匡州下 武德七年開置南雲州貞觀三年改為匡州  
也領縣二與州同置 勃弄 匡川 縣界有永昌故  
城也 領戶四千八百在京師西南五千一百六十五  
里

髻州下 武德四年置西濮州貞觀十一年改為髻州  
也領縣四與州同置 濮水 青蛉 舊屬越雋郡  
岐星 銅山 領戶一千三百九十在京師西南四千

八百五十里南接姚州

尹州下 武德四年置領縣五與州同置 馬邑 天

池 鹽泉 甘泉 涌泉 領戶一千七百無里數接

鬻州

魯州下 武德四年置領縣五與州同置 魯 三部

神泉 龍亭 長和 領戶一千二百七在京師西

南五千一百四十五里西接匡州

鈞州下 武德七年置南龍州貞觀十一年改為鈞州

也領縣二與州同置望水唐封領戶一千在京  
師西南五千六百五十里北接昆州

靡州下武德七年置西豫州貞觀三年改為靡州領  
縣二與州同置磨豫七部領戶一千二百在京  
師西南四千九百四十五里南接姚州

哀州下武德四年置領縣二與州同置揚被強  
樂領戶六千四百七十在京師西南四千九百七十  
里南接姚州

宋州 武德四年置西宋州貞觀十一年去西字領縣  
三與州同置 宗居 石塔 河西 領戶一千九百  
三十在京師西南五千一十里北接姚州

徽州下 武德四年置利州貞觀十一年改為徽州領  
縣二與州同置 深利 十部 領戶一千一百五十  
在京師西南四千九百七十里東接靡州

姚州 武德四年置在姚府舊城北百餘步漢益州郡  
之雲南縣古滇王國楚頃襄王使大將莊蹻泝沅水出



苴蘭以伐夜郎屬秦奪楚黔中地蹻無路能還遂自王  
之秦并蜀通五尺道置吏漢武開西南夷置益州郡雲  
南即屬邑也後置永昌郡雲南哀牢博南皆屬邑也蜀  
劉氏分永昌為建寧郡又分永昌建寧置雲南郡而治  
於弄棟晉改為晉寧郡又置寧州武德四年安撫大使  
李英以此州內人多姓姚故置姚州管州二十二麟德  
元年移姚州治於弄棟川自是朝貢不絕天寶末楊國  
忠用事蜀帥撫慰不謹蠻王閣羅鳳不恭國忠命鮮于

仲通興師十萬渡瀘討之大為羅鳳所敗鎮蜀蠻帥異  
牟尋歸國遂以韋臯為雲南安撫大使命使冊拜謂之  
南詔大和中杜元穎鎮蜀蠻王嵯顛侵蜀自是或臣或  
否咸通中結構南海蠻深寇蜀部西南夷之中南詔蠻  
最大也領縣二 瀘南 縣在瀘水之南 長明 關  
戶三千七百至京師四千九百里

右 上十六州舊屬戎州都督天寶已前朝貢不絕  
舊州中都督府 隋越雋郡武德元年改為舊州領越

雋邛都可蘇祁臺登六縣二年又置昆明縣三年置總  
管府管一州貞觀二年割雅州陽山漢源二縣來屬八  
年又置和集縣天寶元年越雋郡依舊都督府乾元元  
年復為雋州也舊領縣十戶二萬三千五十四口五萬  
三千六百一十八天寶領縣七戶四萬七百二十一口  
七萬五千二百八十在京師西南三千六百五十四里  
越雋 漢郡名武帝置今縣漢邛都縣地屬越雋郡有  
越水雋水後周於越城置嚴州隋改為西寧州尋改雋

州仍分邛都置越雋縣州所治也 邛都 後漢屬越

雋郡漢蘭縣地屬沈黎郡後周置邛都縣也 臺登

漢縣屬越雋郡 蘇祁 漢蘇夷縣屬越雋郡後周平

南夷於故城復置也 西瀘 漢邛都縣地梁置可縣

隋治姜磨戍武德七年移於今天寶末年改為西瀘也

昆明 漢定祚縣屬越雋郡後周置定祚鎮武德二

年鎮為昆明縣蓋南接池故也 會川 上元二年移邛

都縣於會川置因改為會川也

松州下都督府 隋同昌郡之嘉誠縣武德元年置松

州貞觀二年置都督府督岨懿嵯閣麟雅叢可遠奉嚴  
諾義彭軌蓋直肆位玉璋祐臺橋序二十五羈縻等州  
永徽之後生羌相繼忽叛屢有廢置儀鳳二年復加整  
比督文扶當祐靜翼六州都督羈縻三十州研州劍州  
探那州杞州毘州河州幹州瓊州犀州拱州龕州陪州  
如州麻州霸州瀾州光州至涼州蠶州曄州梨州思帝  
州成州統州穀州邛州樂客州達達州卑州慈州據天

寶十二載薄松州都督府一百四州其二十五州有額戶口但多羈縻逃散餘七十九州皆生羌部落或臣或否無州縣戶口但羈縻統之天寶元年改松州為交州郡乾元元年復為松州據貞觀初分十道松文扶當悉柘靜等屬隴右道永徽之後據梁州之境割屬劍南道也舊領縣三戶六百一十二口六千三百五天寶戶一千七十六口五千七百四十二南至翼州一百八十里東至扶州三百三十八里東至茂州三百里西南至當

州三百里西北至吐蕃界九十里至京師二千二百五十里至東都三千五十里

嘉誠 歷代生羌之地漢帝招慰之置護羌校尉別無州縣至後魏白水羌象舒活自稱至之據此地其子舒彭遣使朝貢乃拜龍驤將軍甘松縣子始置甘松縣魏末大亂又絕後周復招慰之於此置龍涸防天和六年改置扶州領龍涸郡隋改甘松為嘉誠縣屬同昌郡武德元年於縣置松州取州界甘松嶺為名 交州 後

周置龍涸郡隋廢為交州縣也 平康 垂拱元年割  
交州及當州通軌翼斜三縣置平康縣屬當州天寶元  
年改為交州郡也

文州 隋武都郡之曲水縣義寧二年置陰平郡領曲  
水長松正西三縣武德改文州貞觀元年省正西入曲  
水天寶元年改為陰平郡乾元元年復為文州舊屬隴  
右道隸松州都督永徽中改屬劍南道也舊領縣二戶  
一千九百八口八千一百四十七天寶戶一千六百八



十六口九千二百五在京師西南一千四百九十里至東都二千二百九十里

曲水 漢陰平道屬廣漢晉亂楊茂搜據為仇池互羌相傳疊代後魏平互羌始置文州隋為曲水縣武德後置文州治於曲水也 長松 後魏置蘆北郡郡置建昌縣後周移郡於此置隋廢郡改縣為長松以白馬水在縣北也

扶州 隋同昌郡武德元年改為扶州天寶元年復為

同昌郡乾元元年復為扶州舊屬隴右道隸松州都督  
永徽後改為劍南道舊領縣四戶一千九百二十八口  
八千五百五十六天寶戶二千四百一十八口一萬四  
千二百八十五在京師西南一千六百九十里至東都  
二千四百四十九里

同昌 歷代吐谷渾所據西魏逐吐谷渾於此置鄧州  
及鄧寧郡蓋以平定鄧至羌為名隋初改置扶州及同  
昌縣煬帝又為同昌郡流於此也 帖夷 後魏置帖

夷郡隋罷為縣萬歲通天二年改為武進神龍依舊為帖夷萬全後魏置武進郡又改為上安郡隋廢郡為尚安縣舊治刺利村長安二年移治黑水堡至德二年八月改為萬全也鉗川後魏置鉗川郡隋罷郡復為縣

龍州下隋平武郡武德元年改為龍門郡其年加西字貞觀元年改為龍門州天寶元年改為油江郡乾元元年復為龍州舊屬隴右道永徽後割屬劍南也舊領

縣二戶一千一十七口六千一百四十九天寶戶二千九百九十二口四千二百二十八在京師西南二千六百六十里至東都三千一十五里

油江 秦漢曹魏為無人之境鄧艾伐蜀由陰道景谷行無人之地七百里鑿山通道攀木緣崖魚貫而進以至江即此城也晉始置陰平郡於此置平武縣至梁有楊李二姓大豪分據其地後魏平蜀置龍州隋初廢郡改平武為油江縣界有石門山清川後魏為盤縣

天寶元年改為清川也

當州下 本松州之通軌縣貞觀二十一年析置當州  
以土出當歸為名州治利川鎮通軌左封二縣顯慶二  
年又析左封置悉州儀鳳二年移治逢臼橋天寶元年  
改為油江郡乾元元年復為當州本屬隴右道也領縣  
三戶二千一百四十六口六千七百一十三至京師三  
千一百里至東都三千九百里東北至松州九百里  
通軌 本屬松州歷代生羌之地貞觀二十年松州首

領董和那蓬固守松府特敕於通軌縣置當州以蓬為  
刺史顯慶元年蓬嫡子屈甯襲繼為刺史又置和利谷  
利平唐三縣也 和利 顯慶二年分通軌置 谷利  
文明元年開生羌置也

悉州 本翼州之左封縣顯慶元年置悉州領悉唐左  
封識曰三縣治唐城咸亨元年移治左封儀鳳二年羌  
叛又寄治當州城內尋歸舊治垂拱二年置歸誠縣載  
初元年移治匪平川天寶元年改為歸誠郡割識白屬

臨翼郡乾元元年復為悉州舊屬隴右道松州都督後屬劍南道領縣一戶八百一十六口三千九百一十四至京師二千七百五十里至東都三千八百里至西靜州六十里西北至當八十里也

左封 本屬翼州在當州東南四十里顯慶元年生羌首領董係比射內附乃於地置悉州州在悉當川故也以董係比為刺史領左封歸誠二縣載初元年又移州理東南五十里匪平川置也 歸誠 垂拱二年分左

# 封置

靜州 本當州之悉唐縣顯慶元年於縣置悉州咸亨元年於悉州置翼州都督府移悉州理左封置儀鳳二年罷都督府翼州却還治於翼斜縣於悉唐縣置南和州天授二年改為靜州北屬隴右道隸松州都督後割屬劍南領縣二戶一千五百七十七口六千六百六十九東北至當州六十里至悉州八十里至京師與當州道里數同也



悉唐縣置在悉唐川舊屬當州顯慶中來屬也靜  
居縣界有靜川也

恭州下開元二十四年分靜州廣平縣置恭州仍置  
博恭烈山二縣天寶元年改為恭化郡乾元元年復為  
恭州本屬隴右道後割屬劍南領縣三戶一千一百八  
十九口六千二百二十二迤東至柘州一百里東北至  
靜州界至京師三千一百二十里

和集舊廣平縣屬靜州開元二十四年於縣置恭州

天寶元年改為和集 博恭 開元二十四年分廣平  
置也 烈山 開元二十四年分廣平置

柘州下 永徽後置天寶元年改為蓬山郡乾元元年  
復為柘州本屬隴右道松州都督後割屬劍南也

保州下 本維州之定廉縣開元二十八年置奉州以  
董晏立為刺史領定廉一縣天寶元年改為雲山郡八  
載移治所於天保軍乃改為天保郡乾元元年二月西  
山子弟兵馬使嗣歸誠王董嘉俊以西山管內天保郡

歸附乃為保州以嘉俊為刺史領縣二戶一千二百四十五口四千五百三十六至京師二千九百四十里至東都三千七百九十里東至維州風流鎮四十五里也定廉 隋置定廉鎮隋末陷羌武德七年招白苟羌置維州及定廉縣以界水名永徽元年廢鹽城併入開元二十八年改為奉州天寶八載改為天寶郡也 歸順雲山 天寶八年分定廉置此二縣也

真州下 天寶五載分臨翼郡之昭德雞川兩縣置昭

德郡乾元元年改為真州取真符縣為名也領縣三戶  
六百七十六口三千一百四十七至京師三千里至東  
都三千八百五十里

真符 天寶五載分雞川昭德二縣置州所治也 雞  
川 先天二年割翼州翼水縣置屬翼州天寶五載改  
真州 昭德 本識曰縣屬悉州天寶初改屬翼州仍  
改名昭德縣五年改屬真州也

霸州下 天寶元年因柘附生羌置靜戎郡乾元元年

改為霸州也領縣一戶一百七十一口一千八百六十一至京師二千六百三十二里至東都三千二百七十一里

信安 與郡同置州所治也

已上十一州舊屬隴右道永徽已後割屬松州都督入劍南道諸州隸松州都督相繼屬劍南也

松州都督府督羈縻二十五州舊督一百州領州無縣戶口惟二十五有名額皆招撫生羌置也

琚州下 貞觀元年招慰党項置州處也領縣二與州同置 江源 洛稽 領戶一百五十五至京師西南二千二百四十六里

懿州下 貞觀五年置西吉州八年改為懿州處党項也領縣二與州同置 吉當 唐位 無戶口至京師西南二千二百五十里

闊州下 貞觀五年置處党項領縣二與州同置 闊源 落吳 無戶口至京師西南二千五百一十里

麟州下 貞觀五年置西麟州處生羌歸附八年去西

字領縣七與州同置 硤川 和善 劔具 硤源

三交 利恭 東陵 無戶口至京師四千五百里

雅州下 貞觀五年處生羌置西雅州八年去西字領

縣三與州同置 新城 三泉 石隴 無戶口至京

師西南二千六百六十里

叢州 貞觀五年党項歸附置也領縣五與州同置

都流厥調湊般匳器邇率鍾並為諸羌部落遙立無縣

寧遠 臨泉 臨河 無戶口至京師西南一千八  
百里

可州 貞觀四年處党項西羌八年改為可州也領縣  
三與州同置 義誠 清化 靜方 無戶口至京師  
西南一千四十里

遠州 貞觀四年生羌歸附置也領縣二與州同置  
羅水 小部川 無戶口至京師西南二千三百六十  
里



奉州 貞觀三年處生羌置西仁州八年改為奉州也  
領縣三與州同置 奉德 思安 永慈 無戶口至  
京師西南二千一百六里

巖州 貞觀五年置西金州八年改為巖州領縣三與  
州同置 金池 甘松 舟巖 無戶口至京師西南  
二千一百里

諾州 貞觀五年處降羌置領縣三與州同置 諾川  
歸德 籬滑 無戶口至京師西南二千六百四十

三里

蛾州 貞觀五年處降羌置領縣二與州同置 常平

那川 無戶口至京師二千七百里

彭州 貞觀三年處降党項置洪州七年改為彭州領

縣四與州同置 洪川 歸遠 臨津 歸正 無戶

口至京師西南一千七百八十里

軌州都督府 貞觀二年處党項置領縣四與州同置

通川 玉城 金源 俄徹 無戶口至京師西南

二千三百九十里

盩州 貞觀四年置西唐州八年改為盩州處降羌也  
領縣四與州同置 湘水 河唐 曲嶺 枯川 戶  
二百二十無口至京師西南二千六百三十里

直州 貞觀五年置西集州八年改為直州處降羌領  
縣二與州同置 集川 新川 戶一百無口至京師  
二千五百里

肆州 貞觀五年處降羌置領縣四與州同置 歸唐

芳叢鹽水磨山無戶口至京師二千六百里  
位州貞觀四年降生羌置西鹽州八年改為位州領  
縣二與州同置位豐西使戶一百無口至京師  
二千四百一十里

玉州貞觀五年處降羌置領縣二與州同置玉山  
帶河戶二百一十五無口至京師二千八百七十  
八里

嶂州貞觀四年處降羌置領縣四與州同置洛平

顯川 桂川 顯平 戶二百無口至京師二千九  
百里

祐州 貞觀四年處降羌置領縣二與州同置 鄠川  
歸定 無戶口至京師二千一百九十里

臺州 貞觀六年處党項置西滄州八年改為臺州無  
縣至京師二千一百三十五里

橋州 貞觀六年處降羌置無縣至京師二千四百里  
序州 貞觀十年處党項置無縣至京師二千四百里

右二十五州舊屬隴右道隸松州都督府貞觀中  
招慰党項羌漸置永徽已後羌戎叛臣制置不一  
今存招降之始以表太平之所至也

嶺南道

南海節度使領是十七州也

廣州中都督府 隋南海郡武德四年討平蕭銑置廣  
州總管府管廣東衛涯南綏岡五州併南康總管其廣  
州領南海增城清遠政賓寶安五縣六年又置高循二

總管隸廣州七年改總管爲大都督九年廢南康都督  
以端封宋涯瀧建齊威扶義勤十一州隸廣府其年又  
省勤州貞觀改中都督府省威齊宋涯四州仍以廢涯  
州之值陽湏匡二縣來屬改東衡爲韶州仍以南康州  
及崖州都督並隸廣州二年省循州都督以循潮二州  
隸廣府八年改建州爲樂州南波州爲湏州扶風州爲  
賓州十二年改南康州十三年省湏州以四會化蒙懷  
集洊安四縣來屬省岡州以義寧新會二縣並屬廣州

其年又以有經畧軍管鎮兵五千四百人其衣糧輕稅  
本道自給廣州刺史充嶺右五府經畧使天寶元年改  
爲南海郡乾元元年復爲廣州舊領縣十戶一萬二千  
四百六十三口五萬九千一百一十四天寶領縣十三  
戶四萬二千二百三十五在京師東南五千四百四十  
七里至東都四千九百里

南海 五嶺之南漲海之北三代已前是爲荒服秦滅  
六國始開越置三郡曰南海桂林象郡以謫戍守之秦



亡南海尉任囂病且死召南海龍川令趙佗付以尉事  
佗乃聚兵守五嶺擊并桂林象郡自稱南越武王子孫  
相傳五代九十三年漢武帝命伏波將軍路博德樓船  
將軍楊僕兵踰嶺南滅之其地立九郡曰南海蒼梧鬱  
林合浦交趾九真日南儋耳珠崖後漢廢珠崖儋耳入  
合浦郡交州刺史領七郡而已今南海縣即漢番禺縣  
南海郡隋分番禺置南海縣番山在州東三百步禺山  
在北一里貪泉州西三十里越王井州北四里番禺

漢縣名秦屬南海郡江漢置交州領郡七吳置廣州

皆治番禺也 增城 後漢番禺縣地吳於縣置東官

有增江 四會 漢縣屬南海武德五年於縣治北置

南浚州領四會化蒙新招化穆化注五縣貞觀元年省

新招化注二縣以廢威州之懷集廢齊州之游安二縣

來屬八年改爲潯州十三年省州及化穆縣以四會化

蒙懷集游安四縣屬廣州也 化蒙 隋縣武德五年

屬南浚州貞觀元年省化注入八年改浚州爲潯州縣

仍屬十三年改屬廣州 懷集 晉懷化縣隋為懷集

武德五年於縣置威州領興平懷集霍清威成四縣貞  
觀元年州廢以懷集屬南綏省興平霍清威成三縣八  
年改潯州為潯州縣仍屬十三年屬廣州東莞 隋  
寶安縣至德二年九月改為東莞郡於嶺外其為名也  
清遠 隋縣武德六年廢故賓縣併入所治也 潯

水 漢封陽縣屬蒼梧郡南齊改為潯安武德四年於  
縣置齊州領潯安宣樂宋昌三縣貞觀元年省齊州及

安樂宋昌二縣以潯安屬浚州八年改浚州為潯州縣  
仍屬十三年潯州廢屬賓州至德二年九月改為潯水  
也 潯陽 漢縣屬桂陽郡隋為直陽五年屬潯州貞觀  
初州廢改真陽潯陽屬廣州潯山在縣北三十里

韶州 隋南海郡之曲江縣武德四年平蕭銑置韶州  
領曲江始興樂昌臨瀧良化五縣貞觀元年改為韶州  
仍割潯州之翁源來屬八年廢臨瀧良化二縣天寶元  
年改為始興郡乾元元年復為韶州舊領縣四戶六千

九百六十口四萬四百一十六天寶領縣六戶三萬一千口十六萬八千九百四十八南至廣州八百里西至郴州五百里東南至度州七百里至京師四千九百三十二里至東都四千一百四十二里

曲江 漢縣屬桂陽郡在曲江川州所治也 始興

漢南野縣地屬豫章郡孫皓分南康郡之南鄉始興縣置縣界 東嶠 一名大庾嶺南越之北塞漢討南越時有將軍城於此五嶺之最東故曰東嶠也 樂昌

隋置 翁源 翁水在縣界隋縣武德五年置涯州貞  
觀初廢以屬韶州 仁化 湏昌 已上二縣天寶後  
新置

循州 隋龍川郡武德五年改為循州總管府管循潮  
二州循州領歸善河源博羅興寧海豐羅陽省龍川歸  
善石城入河源齊昌入興寧貞觀二年廢都督府天寶  
元年改為海豐郡乾元元年復為循州舊領縣五戶六  
千八百九十一口三萬六千四百三十六天寶領縣六

戶九千五百二十五無口數南至廣州四百里東至潮州五百一十七里北至闕州隔山嶺一千六百五十里至東都四千八百里

歸善 秦漢龍川縣地屬南海郡宋置歸善縣縣界羅浮山貞觀元年省龍川縣併入 博羅 漢舊縣屬南

海郡也 河源 隋縣循江一名河源水自虔州雩都縣流入龍川在河源縣云有龍穿地而出即水流漢因置龍川縣貞觀元年省西城併入 海豐 宋縣屬東

莞郡南海豐縣南五十里即漲海渺漫無際武德五年  
分置陸安縣貞觀初併入也興寧漢龍川縣地貞  
觀元年省齊昌併入雷鄉新置

岡州隋南海郡之新會縣武德四年平蕭銑置岡州  
領新會封平義寧三縣貞觀五年州廢以新會義寧屬  
廣州省封平封樂二縣其年又立南州割廣州之新會  
義寧來屬又立封樂縣天寶元年改為義寧郡乾元元  
年復為岡州也舊領縣二戶二千三百五十八口八千



六百六十二天寶戶五千六百五十無口數在京師西南六千三百五里

新會 漢南海縣地晉置新會郡改置封州又改為冗州又改為岡州隋末廢併入廣州武德四年復為岡州舊治盆源城貞觀十三年廢岡州縣屬廣州其年復置州於今治也 義寧 漢番禺縣地宋置義寧縣屬新會郡

賀州 隋蒼梧郡之臨賀縣武德四年平蕭銑置賀州

天寶元年改為臨賀郡乾元元年復為賀州也舊領縣  
五戶六千七百一十三口一萬八千六百二十八天寶  
領縣六戶四千五百無口數在京師東南四千一百三  
十里至東都三千五百七十二里東南至廣州八百七  
十六里東至連州二百六十里南至封州三百六十里  
北至道州四百里北至富州三百二十里西南至梧州  
四百二十二里也

臨賀州所治漢縣屬蒼梧郡臨賀水吳置臨賀郡宋

改為臨慶國齊復為臨賀郡隋置賀州隋末廢為縣武  
德四年復置賀州 桂嶺 漢臨賀縣地隋舊也 馮  
乘 漢縣屬蒼梧郡有荔平關 封陽 漢縣屬蒼梧  
郡 富川 漢富川縣天寶改為富水後復為富川也

蕩山 新置

端州 隋信安郡武德元年置端州領高要樂城銅陵  
平興博林五縣其年以樂城屬康州銅陵屬春州七年  
置清泰縣貞觀十三年省博林清泰二縣天寶元年為

高要郡乾元元年復為端州舊領縣二戶四千四百九十一口二萬四千三百三天寶戶九千五百口二萬一千一百二十東至廣州二百四十里南至新州一百四十里西至康州一百六里至京師四千九百三十五里至東都四千七百里

高要 州所治漢縣屬蒼梧郡齊屬南海郡陳置高要郡隋置端州縣北五里有石室山縣西有鵠奔亭即漢交州刺史行部到鵠亭夜女子鬼訴冤之亭 平興

漢高要縣地隋分置武德七年分置清泰縣貞觀十三年省清泰併入

新州 隋信安郡之新興縣武德四年平蕭銑置新州天寶元年改為新昌郡乾元元年復為新州舊領縣四戶七千三百八十八口三萬五千二十五天寶領縣三戶九千五百東至廣州義寧縣四十一里北至端州一百四十里西北至康州二百七十里西南至勤州一百七十里至京師五千五十二里至東都五千里

新興 漢臨允縣屬合浦郡晉置新寧郡梁置新州

索盧 武德四年析新興縣置 永順 新置

康州 隋信安郡之端溪縣武德四年置康州都督府  
督端康封新宋隴等州九年廢都督府及康州貞觀元  
年又置南康州十一年廢十二年又置康州天寶元年  
改為晉康郡乾元元年復為康州舊領縣四戶四千一  
百二十四口一萬三千五百四天寶戶一萬五千一十  
口一萬七千二百一十九東北至廣州三百四十里西

南至梧州二百八十四里東至端州一百六十里南至  
瀧州二百三十里西至封州一百三十里南至新州二  
百七十里至京師五千七百五十里至東都五千一百  
五十里

端溪 漢縣屬蒼梧郡晉於縣分置晉康郡隋廢郡併  
入信安郡武德復置康州縣界有端山山下有溪也

晉康 隋遂安縣至德二年改為晉康縣 悅城 隋

樂城縣武德五年屬端州又割屬康州改為悅城 都

城 漢端溪縣東百步有程溪亦名零溪溫嫗養龍之溪也

封州下 隋蒼梧郡之封川縣武德四年平蕭銑置封州天寶元年改為臨封郡乾元元年復為封州舊領縣四戶二千五百五十五口一萬三千七百七十七天寶領縣二戶三千九百口一萬一千八百二十七東北至廣州九十里西北至梧州五十五里東至廣州一百三十里北至賀州三百六十六里至京師水陸四千五百



一十里也

封川 州所治漢廣信縣地屬蒼梧郡在封水之陽梁置梁信郡隋平陳改為成州又改為封州隋末州廢為封川縣屬蒼梧郡武德初置封州隋移州於封川口即今縣治也 關建 漢封陽縣地屬蒼梧郡隋舊也

瀧州 隋永熙郡之瀧水縣武德四年平蕭銑置瀧州天寶元年改為開陽郡乾元元年復為瀧州舊領縣四戶三千六百二十七口九千四百三十九天寶領縣五

瀧水 州所治漢端溪縣地屬蒼梧郡晉分端溪立龍

鄉即今州治梁分廣熙郡置建州又分建州之雙頭洞

立雙州隋改龍鄉為平原縣又改為瀧水 開陽 隋

廢縣武德四年分瀧水置 永寧 武德四年於安遂

縣置藥州領安遂永寧安南永業四縣貞觀中廢藥州

以永寧屬瀧水本隋永熙縣武德五年改為永寧縣

鎮南 隋安南縣至德二年九月改為鎮南 建水

新置

恩州 隋高梁郡武德四年平蕭銑置高州都督府管  
高春羅辯雷崖儋新八州七年割崖儋雷新屬廣州貞  
觀二十三年廢高州都督府置恩州天寶元年改為恩  
平郡乾元元年復為恩州內有清海軍管戍兵三千人  
也領縣三戶九千無口數至京師東南六千五百里西  
北六十里接廣州界

恩平 州所治漢合浦郡也隋置海安縣武德五年改  
為齊安至德二年九月改為恩平也 杜陵 隋杜縣

武德五年改為杜陵也 陽江 隋舊置也

春州 隋高梁郡之陽春縣武德四年平蕭銑置春州  
天寶元年改為南陵郡乾元元年復為春州舊領縣一  
戶五千七百一十四口二萬一千六十一天寶領縣二  
戶一萬一千二百一十八至京師東南六千四百四十  
八里東至廣州六百四十二里南至恩州九十三里西  
至高州三百三十里東北至新州二百六十里西北至  
瀧州界也

陽春州所治漢高縣地屬合浦郡至隋不改也 羅

水 天寶後置

高州 隋高梁郡舊治高梁縣後改為西平縣貞觀二十三年分西平杜陵置恩州高州移治良德縣天寶元年改為高梁郡乾元元年復為高州領縣三戶一萬二千四百西北至賓州九十二里北至瀧州界三百五十里西南至藩州九十里東至春州三百三十里至京師六千二百六十二里至東都五千五百二十里

良德 漢合浦縣地屬合浦郡吳置高梁郡宋齊不改  
電白 梁置電白郡隋改為縣也 保定 舊保安  
縣至德二年改為保定

藤州下 隋永平郡武德四年置藤州領永平猛陵安  
基武林隋建陽安普寧戎城寧人淳人大賓貧川十二  
縣貞觀七年以武林屬潯州安普屬燕州寧普屬容州  
八年以猛陵屬梧州十二年以隋建屬龔州天寶元年  
改為感義郡乾元元年復為藤州也舊領縣六戶九千

二百三十六口一萬三百七十二天寶領縣三戶三千九百八十至京師五千五百九十六里至東都五千二百里南至義州二百里西至龔州一百四十九里北至梧州九十七里

鍾津 漢猛陵縣屬蒼梧郡晉置永平郡隋置藤州及  
鍾津感義 義昌 本安昌縣至德二年九月改為義昌

義州下 隋永熙郡之永業縣武德五年置南義州及

四縣貞觀元年州廢以所領縣入建州二年復置義州  
還以故縣來屬五年廢義州縣屬南建州六年復置義  
州又改縣來屬天寶元年改為連城郡乾元元年復為  
義州舊領縣四戶三千二百二十五無口天寶領縣三  
戶一千一百一十口七千二百三至京師五千七百五  
十里至東都四千六百九十里東至梧州隔鄣嶺一百  
七十里北至藤州二百里西至容州九十里東南至寶  
州一百七十二里東北至瀧州二百七十里



岑溪 州所治漢猛城縣屬蒼梧郡武德四年置龍城  
縣置南義州貞觀初廢二年復置義州領龍城安義連  
城義城四縣至德中改安城為永業龍城為岑溪 永  
業 舊安義縣至德年改 連城 武德初分瀧州之  
正義縣置

賓州下 隋永熙郡懷德縣武德四年置南扶州及五  
縣以獠反寄瀧州貞觀元年廢以所管縣並屬瀧州二  
年獠平復置南扶州自瀧州還其故縣五年復廢縣隸

瀧州六年復置以故縣來屬其年改南扶為賓州天寶  
元年改為懷德郡乾元元年復為賓州舊領縣五戶三  
千五百五十天寶領縣四戶一千一十九至京師水陸  
六千一百里至東都水陸五千四百里西至容州二百  
里東至瀧州一百八十里南至潘州一百五十里東南  
至高州九十二里北至義州二百三十里西南至禺州  
一百九十里

信義 漢端溪縣地屬蒼梧隋為懷德縣武德四年析

懷德縣置信義縣仍置南扶州貞觀中改為賓州取州界有羅賓洞為名也 懷德 本屬瀧州後來屬也

潭峩 武德四年分信義縣置也 恃亮 武德四年分信義置也

勤州 隋信安郡之高梁縣地武德四年置勤州隸南康州總管九年改隸廣州其年廢縣屬春州後置勤州以銅陵來屬仍析置富林縣領縣三戶六百八十二口一千九百三十三至京師五千三百九十里至東都五

千里東至新州一百七十里西至瀧州二百六十里南至廣州六百三十五里西北至康州二百七十三里  
富林 州所治析銅陵置 銅陵 漢允吳縣地屬合浦郡宋立瀧潭縣隋改為銅陵以界內有銅山也

桂管十五州在廣州西

桂州下都督府 隋始安郡武德四年平蕭銑置桂州  
總管府管桂象靜融賀樂荔南昆龍九州并定州一總  
管其桂州領始安福祿純化興安臨源永福陽朔歸義

宣風象十縣尋改定州為南尹州其年又置欽州總管  
隸桂府五年置南恭燕梧三州隸桂府九年置晏州隸  
桂府貞觀元年以欽玉南亭三州隸桂府二年省玉州  
南亭州五年置賓州隸桂州六年又以尹藤越白相繡  
鬱姜南宏南方南簡南晉十二州隸桂府其年置龔州  
都督亦隸桂府其年廢龍鬱二州八年改越州為廉州  
南簡為橫州南方為登州南宏為潘州南晉為邕州尹  
州為貴州靜州為富州樂州為昭州南昆為柳州銅州

為容州廢福祿歸義二縣十年廢姜州十二年廢晏州  
以建陵縣來屬廢荔州以荔浦崇仁二縣來屬省宣風  
縣令督桂昭賀富梧藤容潘白廉繡欽橫邕融柳貴十  
七州天寶元年改為始安郡依舊都督府至德二年九  
月改為建陵郡乾元元年復為貴州刺史充經略軍使  
管戍兵千人衣糧稅本管自給也舊領縣十戶三萬二  
千七百八十一口五萬六千五百二十六天寶領戶一  
萬七千五百口七萬一千一十八至京師水陸路四千

七百六十里至東都水陸路四千四十里東至道州五百里西至容州四百九十三里南至昭州二百一十里北至邵州六百八十五里東南至賀州五百三十里西南至柳州八百里東北至永州五百五十里

臨桂 州所治漢始安縣地屬零陵郡吳分置始安郡宋改為始建國南齊始安郡梁置桂州隋末復為始安郡江源多桂不生雜木故秦時立為桂林郡也 理定

漢始安縣隋分置興安近改為理定 靈川 武德

四年分始安置 陽朔 隋舊貞觀元年廢歸義縣併

入 荔浦 漢縣屬蒼梧郡武德四年置荔浦建陵隋

化棠仁純義五年以隋化屬南恭州貞觀元年以建陵

屬晏州十三年廢荔州以荔浦崇仁屬桂州純義屬象

州也 豐水 舊永豐縣元和初改為豐永縣 修仁

隋置建陵縣貞觀元年於縣置晏州領武龍建陵二

縣十二年廢晏州及武龍縣以建陵屬桂州長慶元年

改為修仁縣 恭化 武德四年分始安置純化縣元



和初改為恭化也 永福 武德四年分始安置 臨

源 武德四年分始安置 全義 新置

昭州 隋始安郡之平樂縣武德四年平蕭銑置樂州

領平樂永豐恭城沙亭四縣貞觀七年省沙亭縣八年

改為昭州以昭岡潭為名天寶元年改為樂平郡乾元

元年復為昭州也舊領縣三戶四千九百一十八口一

萬二千六百九十一天寶戶三千五百至京師四千四

百三十六里至東都四千二百一十九里西至桂州二

百二十里東北至道州四百里北至永州六百三十九里南至富州一百六十六里也

平樂 州所治漢荔浦地屬蒼梧郡晉置平樂縣貞觀

二年省沙亭併入也 恭城 武德四年析平樂置

永平 隋縣舊屬藤州

富州下 隋始安郡之龍平縣武德四年平蕭銑置靜州領龍平博勞歸化安樂開江豪靜蒼梧七縣尋又分蒼梧豪靜開江三縣置富州九年省安樂縣貞觀八年

改為富州以富川水為名天寶元年改為開江郡乾元  
元年復為富州舊領縣三戶三千三百四十九口四千  
三百一十九天寶戶一千二百九十至京師五千一百  
三十里至東都四千八百五十里西北至桂州界八十  
里東南至梧州界九十里北至昭州一百六十里

龍平

漢臨賀縣地屬蒼梧郡吳置臨賀郡梁分臨賀

置南靜郡又改為靜州改南靜郡為龍平縣貞觀八年  
改為富川因水為名也 思勤 新置 馬江 隋開

江縣長慶元年改為馬江皆漢臨賀縣地

梧州下

隋蒼梧郡武德四年平蕭銑置梧州領蒼梧

豪靜開江三縣貞觀八年割藤州之孟陵賀州之綏越  
來屬十三年廢豪靜縣天寶元年改為蒼梧郡乾元元  
年復為梧州也舊領縣四戶三千八十四口五千四百  
二十三天寶領縣三戶五千至京師五千五百里至東  
都五千一百里東至封州八十里東北至賀州四百一  
十里北接富州界正西至藤州一百九十里

蒼梧 漢蒼梧郡治廣信縣即今治隋立蒼梧縣於此  
置郡 戎城 隋縣舊屬藤州今來屬 孟陵 漢孟陵  
縣屬蒼梧郡

蒙州 隋始安郡之隨化縣武德四年置南蒙州割荔  
州之立山東區純義三縣分置嶺政縣貞觀八年改為  
蒙州取州東蒙山為名十二年省嶺政入立山天寶元  
年改為蒙山郡乾元元年復為蒙州舊領縣三戶一千  
六十九天寶戶一千五十九至京師五千一百里至東

都四千七百里南至桂州二百四十九里東至富州九十七里西南至象州一百七十六里

立山 州所治漢荔浦縣屬蒼梧郡隋分荔浦置隨化縣武德四年改為立山於縣置荔州尋改為恭州貞觀八年改為蒙州州東蒙山山下有蒙水居人多姓蒙故也 東區 武德五年分立山置荔州貞觀六年屬驚州十年改為蒙州 正義 貞觀五年置純義縣屬荔州乾元初改為正義也

龔州下 隋永平郡之武林縣貞觀三年置鷺州七年  
移鷺州於今州東仍於鷺州之舊所置龔州都督府督

龔潯蒙賓澄鷺七州割滕州之武林鷺州之秦川來屬  
又立南平西平歸政大同四縣十二年廢潯州以桂平  
陵江大賓皇化四縣來屬其年省秦川入南平省陵江  
入桂平省歸政入西平又割滕州之隋建來屬天寶元  
年改為臨江郡乾元元年復為龔州舊領縣八戶一萬  
三千八百二十一口一萬一千一百三十八天寶領縣

六戶九千口二萬一千至京師五千七百二十里至東  
都五千三百六十一里東至藤州一百四十九里南至  
繡州九十五里西至潯州一百三十里北至蒙州二百  
四十里

南平 州所治漢猛陵縣地屬蒼梧郡晉分蒼梧置永  
郡乃置武城縣貞觀七年分置南平縣後自武林移龔  
州治於此也 武林 猛陵縣地隋分置武林縣屬藤  
州貞觀七年屬龔州 隋建 猛陵縣地武德年屬藤



州貞觀年屬龔州也 大同 貞觀元年分置 陽川  
本陽建縣後改為陽川也

潯州下 隋永平郡之桂平縣貞觀七年置潯州領桂  
平陵江大賓皇化四縣十二年廢潯州以四縣屬龔州  
後復置潯州以桂平大賓皇化來屬又省陵江入桂平  
天寶元年改為潯江郡乾元元年復為潯州也舊領縣  
三戶二千五百口六千八百三十六至京師五千九百  
六十里至東都五千七百里東至龔州一百三十里西

至潘州二百五十里西南至貴州一百五十里西北至蒙州三百六十里西南接鬱林州界

桂平 漢布山縣鬱林郡所治也隋為桂平縣武德年屬貴州貞觀初屬蘆州七年屬潯州十二年州廢屬龔州復置潯州 宣化 漢河林縣屬鬱林郡隋置皇化縣後廢貞觀六年復置屬潯州州廢屬龔州又後屬潯州

鬱林州下 隋鬱林郡之石南縣貞觀中置鬱林州領

石南興德天寶元年改為鬱林郡乾元元年復為鬱林  
州也領縣五戶一千九百一十八口九千六百九十九  
至京師五千五百七里至東都五千一百六十里東至  
平琴州九十里南至牢州一百二里西南至韶州一百  
一十里北至貴川一百五十里

石南 州所治漢鬱林郡之地梁置定州隋改尹州煬  
帝為鬱林郡皆治於此陳時置石南郡隋改為縣也

鬱林 隋縣屬桂州後來屬興業 興德 武德四年

分鬱林置潭栗

關

平琴州下 漢鬱林郡地唐置平琴州無年月領縣四天寶元年改為平琴郡乾元元年復為州建中併入黨州今存領縣四戶一千一百七十四至京師六千四百八十里至東都五千八百三十里西至鬱林州九十里東南至牢州一百一十里北至貴州一百五十里北至繡州九十二里東至黨州二十二里

容山 州所治本名安仁至德年改也 懷義 福陽

占符 三縣與州同置

賓州下 隋鬱林郡之嶺方縣貞觀五年析南方之嶺  
方思千琅邪南尹州之安縣置賓州十二年省思千縣  
天寶元年改爲安城縣至德二年九月改爲嶺方郡乾  
元元年復爲賓州舊領縣三戶七千四百八十五天寶  
戶一千九百七十六口八千五百八十至京師四千三  
百里至東都四千一百里南至淳州二百里東南至貴  
州一百七十里西至邕州二百五十七里東南至蒙州

三百二十里西北至澄州一百二十里也

嶺方 漢縣屬鬱林郡武德四年屬南方州貞觀五年

改爲賓州 琅邪 武德四年析嶺方縣置 保城

梁置安城縣至德二年改爲保城也

澄州下 隋鬱林郡之嶺方縣地武德四年平蕭銑置

方州領無虞琅邪思干上林止戈賀水嶺方七縣貞觀  
五年以上林止戈琅邪嶺方屬賓州八年改南方州爲  
澄州天寶元年改爲賀水郡乾元元年復爲澄州舊領

縣四戶一萬八百六十八天寶後戶一千三百六十八口八千五百八十至京師四千六百里至東都四千三百里南至邕州三百里北至賓州四百三十里東南至賓州一百二十里西至古州五百七十九里

上林 州所治漢嶺方縣地武德四年析置上林縣也  
無虞 武德四年析嶺方置 賀水 武德四年析柳州馬平縣置

繡州下 隋鬱林郡之阿林縣武德四年置林州領常

林阿林皇化歸誠羅繡盧越等縣六年改爲繡州貞觀六年省歸誠盧越七年以皇化屬潯州天寶元年改爲常林郡乾元元年復爲繡州領縣三戶九千七百七十三至京師六千九十里至東都五千五百里南至黨州五十里北至貴州一百里也

常林 漢阿林縣地屬鬱林郡武德四年析貴州之鬱平縣置林州及常林縣貞觀六年省歸誠縣入常林縣移治廢歸誠縣故城又改林州爲繡州 阿林 漢縣



屬鬱林郡

羅繡

武德四年析阿林置

象州下

隋始安郡之桂林縣武德四年平蕭銑置象

州領陽壽西寧桂林武仙武德五縣貞觀十二年省西

寧縣割廢晏州武化長風來屬天寶元年改爲象山郡

乾元元年復爲象州舊領縣六戶一萬一千八百四十

五口一萬二千五百二十一天寶領縣三戶五千五百

口一萬八百九十至京師四千九百八十九里北至桂

州四百里東至象州一百七十六里南至費州三百里

西北至柳州二百里東南至潯州三百六十里西南至  
巖州二百九十里也

武化

州所治漢潭中縣地屬鬱林郡隋建陵縣屬桂

州武德四年析建陵置武化縣屬晏州貞觀十二年廢  
晏州來屬仍自武德縣移象州於縣置非秦之象郡秦  
象郡今合浦縣武德漢中溜縣地屬鬱林郡吳於  
縣置鬱林郡仍分中溜置桂林縣武德四年改爲武德  
於縣界置象州陽壽隋縣武仙武德四年析

桂林置

柳州 隋始安郡之馬平縣武德四年平蕭銑置昆州  
領馬平新平文安賀水歸德五縣其年改歸德爲脩德  
改文安爲樂沙仍加昆州爲南昆州八年以賀水屬澄  
州貞觀七年省樂沙入新平縣以廢龍州之龍城來屬  
八年改南昆爲柳州九年置崖山縣十二年省新平入  
馬平天寶元年改爲龍城郡乾元元年復爲柳州以州  
界柳嶺爲名舊領縣四戶六千六百七十四口七千六

百三十七天寶領縣五戶二千二百三十二口一萬一千五百五十至京師水陸相乘五千四百七十里至東都水陸相乘五千六百里東至桂州四百七十里至粵州二百九十里北至融州二十里東南至象州二百里北至柳州三十里

馬平 州所治漢潭中縣地屬鬱林郡隋置馬平縣武

德四年於縣置昆州又改爲柳州也 龍城 隋縣武

德四年置龍州領龍城柳嶺二縣貞觀七年廢龍州省

柳嶺縣 象 貞觀中置 洛曹 舊洛封縣元和十

二年改 洛容 皆漢潭州地貞觀後析置

融州下 隋始安郡之義熙縣武德四年平蕭銑置融  
州復開皇舊名領義熙臨牂黃水安修四縣六年改義  
熙爲融水貞觀十二年省安修入臨牂天寶元年改爲  
融水郡乾元元年復爲融州舊領縣三戶二千七百九  
十四口三千三百三十五天寶戶一千二百三十二至  
京師五千二百七十里至東都四千四百七十里東至

桂州四百九十一里南至柳州三十里至武零山二百里也

融水 漢潭中地與柳州同隋置義熙縣武德四年改爲融水州所治也 武陽 舊黃水臨群二縣析融水置後併入改爲武陽

邕管十州在桂府西南

邕州下都督府 隋鬱林郡之宣化縣武德四年置南晉州領宣化一縣貞觀六年改爲邕州都督府天寶元

年改爲朗寧郡乾元元年復爲邕州上元後置經畧使  
領邕貴黨橫等州後又罷長慶二年六月復置經畧使  
以刺史領之刺史充經畧使管戍兵一千七百人衣糧  
稅本管自給舊領縣五戶八千二百二十五天寶後戶  
二千八百九十三口七千三百二至京師五千六百里  
至東都五千三百二十七里東南至欽州三百五十里  
東北至賓州二百五十里西南至羈縻左州五百里  
宣化州所治漢嶺方縣地屬鬱林郡秦爲桂林郡地

驩水在縣北本群柯河俗呼鬱狀江即駱越水也亦名  
溫水古駱越地也 武緣 隋廢縣武德五年復置也  
晉興 晉於此置晉興郡隋廢爲縣 朗寧 武德  
五年分置 思龍 如和 封陵 三縣開碕洞漸置  
也

貴州下 隋鬱林郡武德四年平蕭銑置南尹州總管  
府管南尹南晉南簡南方藤南容越繡九州南尹州領  
鬱林馬嶺安城鬱平石南桂平嶺山興德湖水懷澤十



一縣五年以桂平屬鬱州嶺山屬南橫州貞觀五年以  
安城屬賓州七年罷都督府九年改南尹爲貴州天寶  
元年改爲懷澤郡乾元元年復爲貴州也舊領縣八戶  
二萬八千九百三十口三萬一千九百九十六天寶領  
縣四戶三千二十六口九千三百至京師五千三百八  
十里至東都五千一百二十里東至繡州一百里南至  
鬱林州一百五十里西至橫州二百里北至象州三百  
里西南至賓州九十四里東北至潯州一百五十里

鬱平 漢廣鬱縣地屬鬱林郡古西甌駱越所居後漢  
谷永爲鬱林太守降烏潯人十萬開七縣即此也烏潯  
之俗男女同川而浴生首子食之云宜弟娶妻美讓兄  
相習以鼻飲秦平天下始招慰之置桂林郡漢改爲鬱  
林郡地在廣州西南安南府之地邕州所管郡縣是也  
隋分鬱平縣鬱江在州東也 懷澤 宋廢縣武德四  
年又置 潮水 武德四年分鬱林置 義山 新置  
黨州下 古西甌所居秦置桂林郡漢爲鬱林郡唐置

黨州失起置年月與平琴州同土俗西至平琴治所二十里天寶元年以黨州爲寧仁郡乾元元年復爲黨州建中二年二月廢平琴州併入領縣四戶一千三百口七千四百至京師地理與平琴州同南至牢州一百里北至繡州五十里東南至容州一百五十里北接繡州界百餘里也

橫州下 隋鬱林郡之寧浦縣武德四年置簡州領寧浦樂山蒙澤浮風嶺山五縣六年改爲南簡州貞觀八

年改橫州天寶元年改爲寧浦郡乾元元年復爲橫州也舊領縣四戶一千一百二十八口一萬七百三十四天寶領縣三戶二千九百七十八口八千三百四十二至京師五千五百三十九里至東都四千七百五里南至欽州三百五十里西至巒州一百五十里北至貴州三百六十里也

寧浦 鬱州所治漢廣鬱縣地屬鬱平郡吳分置寧浦郡晉宋齊不改梁分置簡陽郡隋平陳郡並廢置簡州

不改煬帝廢州置寧浦縣鬱林郡武德復置改爲橫州  
從化 漢高梁縣地屬合浦縣武德四年分寧浦置  
淳風縣貞觀元年改爲從化也 樂山 漢高梁縣地  
隋置樂山縣

田州 土地與邕州同失廢置年月疑是開元中置天  
寶元年改爲橫山郡乾元元年復爲田州舊領縣五戶  
四千一百六十八舊圖無四至州郡及兩京道里數  
都救 惠性 武籠 橫山 如賴 並與州同置也

嚴州 秦桂林郡地後爲獠所據乾封元年招致生獠  
置嚴州及三縣天寶元年改爲修德郡乾元元年改爲  
嚴州領縣三戶一千八百五十九口七千五十一至京  
師五千三百二十七里至東都四千八百九十三里東  
北至闕州三百四十里東南接象州界西北接澄州界  
也

夾賓 州所治也

循德 歸化 與州同置

山州 失起置年月天寶元年改爲龍池郡乾元元年

復爲山州領縣二戶一千三百二十無四至及京洛里數

龍池 州所治也

巒州 秦桂林郡唐置淳化失起置年月天寶元年改爲永定郡乾元元年復爲淳州永貞元年改爲巒州也領縣三戶七百七十口三千八百三至京師五千三百里至東都四千九百里南至橫州一百四十里西至邕州三百里北至賓州二百五十五里

永定 州所治也

武羅 靈竹 二縣與州同置

羅州 隋高涼郡之石龍縣地武德五年於縣置羅州  
領石龍吳川陵羅梁龍辯南河石城招義零緣慈廉羅  
肥十一縣六年移羅川於石城縣於舊所置南石州割  
石龍陵羅龍化羅辯慈廉羅肥屬南石州天寶元年改  
羅州爲招義郡乾元元年復爲羅州舊領縣五戶五千  
四百六十口八千四十一至京師六千五百二十二里  
至東都五千七百五里東至大海一百三十九里南至



雷州二百五十里西至廉州二百五十里北至辯州一百五十里西南至零緣縣大海一百二十里西北至白州二百三十里東北至新州五十里

石城

州所治漢合浦郡地宋將檀道濟於陵羅江口

築石城因置羅州屬高涼郡唐復置羅州於縣 吳川

隋義

招義

武德五年析石龍縣置也

南河

武德五年析石龍縣置也

潘州下

隋合浦郡之定川縣武德四年置南宕州領

南昌定川鄰川思城溫水宕川六縣治南昌縣貞觀六年移治定川八年改爲潘州仍廢思城縣天寶元年改爲南潘郡乾元元年復爲潘州也舊領縣五戶一萬七百四十八天寶後領縣三戶四千三百口八千九百六十七至西京七千一百六十一里至東都六千三百八十九里至高州九十里南至大海五十六里至辯州一百二十里北至賓州一百五十一里

茂名州所治古西甌駱越地秦屬桂林郡漢爲合浦

郡之地隋治定川縣武德四年平嶺表於縣置宕州改爲潘州仍改縣茂名也 南巴 隋廢縣武德五年置

潘州 以縣水爲名武德五年分置也

容管十州在桂管西南

容州下都督府 隋合浦郡之北流縣武德四年平蕭  
鉞置銅州領北流豪石宕昌渭龍南流陵城普寧新安  
八縣貞觀元年改爲容州以容山爲名十一年省新安  
縣開元中升爲都督府天寶元年改爲普寧郡乾元元

年復爲容州都督府仍舊置防禦經畧招討等使以刺史領之刺史充經畧軍使管鎮兵一千一百人衣糧稅本管自給舊領縣七戶八千八百九十天寶後領縣五戶四千九百七十口一萬七千八十七至京師五千九百一十里至東都五千四百八十五里東至藤州二百五十九里南至賓州二百里西至禺州十五里北至龔州二百里西至隋建縣一百九十里西北至黨州一百五十里東北接義州界

北流 州所治漢合浦縣地隋置北流縣縣南三十里  
有兩石相對其間闊三十步俗號鬼門關漢伏波將軍  
馬援討林邑蠻路由於此立碑石龜尚在昔時趨交趾  
皆由北關其南尤多瘴癘去者罕得生還諺曰鬼門關  
十人九不還其土少鐵以礬石燒爲器以烹魚鮓北人  
名五侯礁石一經火久之不冷即今之滑石也亦名冷  
石 普寧 隋置 陵城 武德四年析北流置 渭  
龍 武德四年析普寧置 欣道 新置

辯州下 隋高涼郡之石龍縣武德五年置羅州移置

石城於舊所置南石州領石龍陵羅龍化羅辯慈廉羅肥六縣貞觀九年改石南州爲辯州省慈廉羅肥二縣天寶元年改陵水郡乾元元年復爲辯州也舊領縣四戶一萬三百五十天寶後領縣三戶四千八百五十八口一萬六千二百九至京師五千七百一十八里至東都五千三百七十里東至廣州一千一百四十四里南至羅州吳川縣界五十里南至白州博白縣二百三十

里北至禺州三百八十二里南至潘州四十里西南至羅州一百五十里西北至白州三百里

石龍 州所治漢高涼縣地屬合浦郡秦象郡地武德五年屬羅州六年改屬辯州陵羅武德五年置羅州六年改爲南石州也 龍化 武德五年分置也

白州下 隋合浦郡之合浦縣地武德四年置南州領博白郎平周羅龍豪淳良建寧六縣六年改爲白州貞觀十二年省郎平淳良二縣天寶元年改爲南昌郡乾

元元年復爲白州舊領縣四戶八千二百六天寶領縣  
五戶二千五百七十四口九千四百九十八至京師六  
千一百七十五里至東都五千九百一十九里東至辯  
州二百里南至羅州二百二十里西至州界郎平山八  
十里北至牢州一百里西南至廣州二百里東北至禺  
州二百里

博白 州所治漢合浦郡地武德五年析合浦縣置  
建寧 武德四年析合浦縣置貞觀十二年省淳良併



入 周羅 武德四年析合浦置 龍豪 武德四年  
析合浦置 南昌 隋縣舊屬潘州又來屬也

牢州下 本巴蜀徼外蠻夷地漢牂柯郡地武德二年  
置義州五年改爲智州貞觀十二年改爲牢州以牢石  
爲名天寶元年改爲定川郡乾元元年復爲牢州也舊  
領縣三戶一千六百四十一口一萬一千七百五十六  
去京師與容州道里同東至容州一百二十五里南至  
白州一百里西至鬱林州一百一十里北至黨州一百

里

南流 武德四年析容州北流縣置屬容州貞觀十一年改智州爲牢州以牢石爲名牢石高四十丈周二十里在州界也 定川 宕川 貞觀十一年分南流置也

欽州下 隋寧越郡武德四年平蕭銑改爲欽州總管府管一府領欽江安京南賓遵化內亭五縣五年置如和縣其年置五川南亭州並隸欽府以內亭遵化二縣

屬亭州貞觀元年罷都督府二年廢亭州復以內亭遵  
化並來屬十年省海平縣天寶元年改爲寧越郡乾元  
元年復爲欽州也舊領縣七戶一萬四千七十二口一  
萬八千一百二十七天寶領縣五戶二千七百口一萬  
一百四十六至京師五千二百五十一里東至嚴州四  
百里南至大海二百五十里西至灤州六百三十里至  
橫州三百五十里東南至廣州七百里西南至陵州六  
百里西至容州三百五十里東北至貴州四百里

欽江 州所治漢合浦縣地宋分置宋壽郡及宋壽縣  
梁置安州隋改爲欽州仍改宋壽縣爲欽江煬帝改爲  
寧越郡皆治欽江也 保京 隋安京縣至德二年改  
爲保京縣北十里安京山下有如和山似循州羅浮山  
形勢遵化 隋舊置 內亭 隋縣武德五年於縣  
置南亭州貞觀元年州廢復屬欽州也 靈川 已上  
縣並漢合浦縣也

禺州 隋合浦郡之定川縣武德四年置南宕州領南

昌定川陸川思城溫水宕川六縣治南昌縣貞觀六年  
移治定川八年改爲潘州仍廢思城總章元年改爲東  
義州移治義石縣二年改爲昌州天寶元年改爲溫水  
郡乾元元年復爲禺州舊領縣五戶一萬七百四十八  
天寶領縣四戶三千一百八十至京師五千三百五十  
里至東都五千里至義州一百九十里南至辯州三百  
里西至白州二百里北至容州一百一十里

義石 秦象郡地晉南昌郡之邊邑爲禺州所治也

溫水 武德四年析南昌置 陸川 隋廢縣武德四

年置 扶桑 武德四年置

湯州下 秦象郡地唐置湯州失起置年月天寶元年

改爲溫泉郡乾元元年復爲湯州也領縣三無戶口及

無兩京道里四至州府 湯泉 州所治也 淶水

羅韶 與州同置

灤州下 貞觀十二年清平公李弘節遣欽州首領甯

師京尋劉方故道行達交趾開拓夷獠置灤州天寶元

年改爲臨潭郡乾元元年復爲瀼州領縣四戶一千六百六十六無兩京地理東至欽州六百三十里北至容州二百八十二里在安南府之東北鬱林之西南

臨江州所治也波零鵠山弘遠與州同置

巖州下土地與合浦郡同唐置巖州失起置年月天寶元年改爲安樂郡至德二年改爲常樂郡乾元元年復爲巖州領縣四戶一千一百一十無兩京道里四至州府也

常樂 本安樂縣至德二年改州所治 思封 高城

石巖 與州同置

古州 土地與灤州同年置天寶元年改爲樂古郡乾元元年復爲古州

安南府在邕管之西

安南都督府 隋交趾郡武德五年改爲交州總管府  
管交峰愛仙鳶宋慈險道龍十州其交州領交趾懷德  
南定宋平四縣六年澄慈道宋並加南字七年又置王



州隸交府貞觀九年省南宋州以宋平縣省隆州以陸  
平縣及朱鳶縣省龍州以龍編縣並隸交府仍省懷德  
縣及南慈州二年廢玉州入欽州六年改南道州爲仙  
州十一年廢仙州以平道縣來屬今督交峰愛驩四州  
調露元年八月改交州都督府爲安南都護府大足元  
年四月置武安州南登州並隸安南府至德二年九月  
改爲鎮南都護府後爲安南府刺史充都護管兵四千  
二百舊領縣八戶一萬七千五百二十三口八萬八千

七百八十八天寶領縣七戶二萬四千二百三十口九萬九千六百五十二至京師七千二百五十三里至東都七千二百二十五里西至愛州界小黃江口水路四百一十六里西南至長州界文陽縣靖江鎮一百五十里西北至峰州嘉寧縣論江口水路一百五十里東至朱鳶縣界小黃江口水路五百里北至朱鳶州阿勞江口水路五百四十九里北至武平縣界武定江二百五十二里東北至交趾縣界福生去十里也

宋平

漢西捲

音拳

縣地屬日南郡自漢至晉猶爲西捲

縣宋置宋平郡及宋平縣隋平陳置交州煬帝改爲交

趾刺史治龍編交州都護制諸蠻其海南諸國大抵在

交州南及西南居大海中洲上相去或三五百里三五

千里遠者二三萬里乘舶舉帆道里不可詳知自漢武

已來皆朝貢必由交趾之道武德四年於宋平置宋州

領宋平弘義南定三縣五年又分宋平置交趾懷德二

縣自貞觀元年廢南宋州以弘教懷德交趾三縣省入

宋平縣移交趾縣名於漢故交趾城置以宋平南定二

縣屬交州

交趾

漢交趾郡之羸樓

二字並音來口反

地隋

爲交趾縣取漢郡名武德四年置慈廉烏延武立三縣  
六年改爲南慈州貞觀初州廢并廢三縣併入交趾

朱鳶

漢縣名交趾郡今縣吳軍平縣地舊置武平縣

龍編

漢交趾郡守治羸樓後漢問尚爲交趾太守乃

移治龍編言立城之始有蛟龍盤編津之間因爲城名  
武德四年於縣置龍川武寧平樂三縣貞觀初廢龍川

以武寧平樂入龍編割屬仙州十年廢仙州以龍編屬

交州也 平道 漢封溪縣地又南齊置昌國縣南越

志交趾之地最爲膏腴舊有君長曰雄王其佐曰雄侯

後蜀王將兵三萬討雄王滅之蜀以其子爲安陽王治

交趾其國地在今平道縣東其城九重周九里士庶蕃

阜尉佗在番禺遣兵攻之王有神弩一發殺越軍萬人

趙佗乃與之和以其子始爲質安陽王以媚珠妻之子

始得弩毀之越兵至乃殺安陽王兼其地武德四年於

縣置道州領平道昌國武平三縣六年改爲南道州又  
改爲仙州貞觀十年廢仙州以昌國入平道屬交州  
武平 吳置武平郡隋爲縣本漢封溪縣後漢初糜冷  
縣女子徵側叛攻陷交趾馬援率師討之三年方平光  
武乃增置望海封溪二縣即此也隋曰隆平武德四年  
改爲武平

武義州下 土地與交州同置武義州失起置年月天  
寶元年改爲武義郡乾元元年復爲武義州領縣五戶

一千八百五十無口無兩京道里及四至州府也

武義 州所治也 武緣 武勞 梁山 皆與州同

置也

粵州下 土地與交州同唐置粵州失起置年月天寶元年改爲龍水郡乾元元年復爲粵州領縣四無戶口數亦無兩京道里及四至州府也

龍水 州所治也 崖山 東璽 天河 皆與州同

置

芝州下 土地與交州同唐置芝州失起置年月天寶

元年改爲忻城郡乾元元年復爲芝州領縣一 忻城

州所治無戶口及兩京道里四至州府最遠惡處

愛州 隋九真郡武德五年置愛州領九真松源楊山

安頂四縣又於州界分置積順永胥前真山七州改永

州爲都州九年改積州爲南陵州貞觀初廢都州入前

真州其年廢真胥二州入南陵州又廢安州以隆安縣

廢山州以建初縣並屬州又廢楊山安頂二縣入九真



縣改南陵州復爲真州八年廢建初入隆安九年廢松  
源入九真九年廢真州以胥浦軍安日南移風四縣屬  
愛州天寶元年改爲九真郡乾元元年復爲愛州九真  
南與日南接界西接牂柯界北與巴蜀東北接與鬱林  
州山險溪洞所居舊領縣七戶九千八十口三萬六千  
五百一十九天寶領縣六戶一萬四千七百至京師八  
千八百里至東都八千一百里在交州西不詳道里遠  
近其南即驩州界

九真 漢武帝開置九真郡治於胥浦縣領居風都能

餘發咸歡無功無編等今七縣九真縣即漢地吳改爲

移風隋改爲九真州所治自漢至南齊爲九真郡梁置

愛州隋爲九真郡 安順 隋舊武德三年置順州又

分置東河建昌邊河並屬順州州廢及三縣皆併入安

順屬愛州也 崇平 隋陸安縣武德五年於縣置安

州及山州又分隆安立教山建道都掘三縣並屬安州

領四縣又置岡山真潤古安西安建功五縣屬山州貞

觀元年廢安州及三縣又廢山州及五縣以隆安隸愛  
州先天元年改爲崇安至德二年改爲崇平 軍寧

隋軍安縣武德五年於縣界置永州七年改爲都州貞  
觀元年改爲前真州十年改屬愛州至德二年改爲軍

寧 日南 漢屬風地縣界有屬風山上有風門常有

風其山出金牛往往夜見照耀十里時鬪則海水沸溢  
有霹靂人家牛皆怖號曰神牛隋爲日南縣 無編

漢舊縣屬九真郡又有漢西于縣故城在今縣東所置

也

福祿州下 土俗同九真郡之地後爲生獠所據龍朔三年智州刺史謝法成招慰生獠昆明北樓及生獠等七千餘落總章二年置福祿州以處之天寶元年改爲福祿郡至德二年改爲唐杜郡乾元元年復爲福祿州領縣二無戶口及兩京道里四至州郡

柔遠 州所治與州同置本名安遠至德二年改爲柔遠也

長州 土俗與九真同唐置長州失起置年月天寶元年改爲文陽郡乾元元年復爲長州領縣四戶六百四十八無口及兩京道里四至州府也

文陽 銅蔡 長山 其常 皆與州同置

驩州 隋日南郡武德五年置南德州總管府領德明智驩林源景海八州南德州領六縣八年改爲德州貞觀初改爲驩州以舊驩州爲演州二年置驩州都督府領驩演明智林源景海八州十二年廢明源海三州天

寶元年改爲日南郡乾元元年復爲驩州也舊領縣六  
戶六千五百七十九口一萬六千六百八十九天寶領  
縣四戶九千六百一十九口五萬八百一十八至京師  
陸路一萬二千四百五十二里水路一萬七千里至東  
都一萬一千五百九十五里水路一萬六千二百二十  
里東至大海一百五十里南至林州一百五十里西至  
環王國界八百里北至愛州界六百三里南至盡當郡  
界四百里西北到靈趾江四百七十里東北至辯州五

百二里

九德 州所治古越裳氏國秦開百越此爲象郡漢武  
元鼎六年開交趾已南置日南郡治於朱吾領北景盧  
容西捲象林五縣吳分日南置九德郡晉宋齊因之隋  
改爲州廢九德郡爲縣今治也後漢遣馬援討林邑蠻  
援自交趾循海隅開側道以避海從蕩昌縣南至九真  
郡自九真至其國開陸路至日南郡又行四百餘里至  
林邑國又南行二千餘里有西屠夷國鑄二銅柱於象

林南界與西屠夷分境以紀漢德之盛其時以不能還

者數十人留於其銅柱之下至隋乃有三百餘家南蠻

呼爲馬留人其水路自安南府南海行三千餘里至林

邑計交趾至銅柱五千里 浦陽 晉置 懷驩 隋

爲咸歡縣屬九真郡武德五年於縣置驩州領安人扶

演相景西源四縣治安人貞觀九年改爲演州十三年

省相景縣入扶演二十六年廢演州其所管四縣廢入

咸驩後隋改爲懷驩 越裳 吳置武德五年於縣置



明州析置萬安明弘明定二縣隸之又分日南郡文谷  
金寧二縣置智州領文谷新鎮閣員金寧四縣貞觀十  
三年廢明州越裳屬智州後又廢智州以越裳屬驩州  
林州 隋林邑郡貞觀九年於綏懷林邑置林州寄治  
於驩州南界今廢無名領縣三無戶口去京師一萬二  
千里

林邑 州所治漢武帝開百越於交趾郡南三千里置  
日南郡領縣四治於朱吾其林邑即日南郡之象林縣

縣在南故曰日南郡南界四百里後漢時中原喪亂象  
林縣人區連殺縣令自稱林邑王後有范熊者代區連  
相傳累世遂為林邑國其地皆開北戶以向日晉武時  
范氏入貢東晉末范攻陷日南郡告交州刺史告蕃求  
以日南郡北界橫山為界其後又陷九真郡自是屢寇  
交趾南界至貞觀中其主修職貢乃於驩州南僑置林  
邑郡以羈縻之非正林邑國 金龍 隋文帝時遣大  
將劉方率兵萬人自交趾南伐林邑國敗之其王梵志

遁走方收其廟主一十八人皆鑄金爲之方盡虜其人  
空其地乃班師因方得其龍乃爲縣名 海界 三縣  
並貞觀九年置

景州 隋北景郡貞觀二年置南景州寄治驩州南界  
八年改爲景州後亦廢無其名領縣三無戶口至京師  
一萬一千五百里 北景 漢縣名屬日南郡在安南  
府南三千里北景在南晉將灌邃攻林邑王范佛破其  
國遂於其國五月五日立表北景在表南九寸一分故

自北景以南皆北戶以向日也北字或單爲匕

由文 貞觀二年置也 朱吾 漢日南郡所治之縣

也前志曰朱吾人不粒食依魚資魚爲生託去朱吾在  
日南郡北僑立名也

峰州下 隋交趾郡之嘉寧縣武德四年置峰州領嘉

寧新昌安仁竹輅石堤封溪六縣貞觀元年廢石堤封  
溪入嘉寧竹輅入新昌天寶元年改爲承化郡乾元元  
年復爲峰州也舊領縣三戶五千四百四十四口六千

四百三十五天寶領縣五戶一千九百二十州在安南府西北至京師七千七百一十里

嘉寧州所治漢麋泠縣地屬交趾郡古交朗夷之地秦屬象郡吳分交趾置新興郡晉改爲新昌宋齊因之改爲興州隋初改爲華州煬帝廢併入交趾武德復置峰州也

承化新昌高山珠綠高山珠綠新置

陸州隋寧越郡之玉山縣武德五年置玉山領安海

海平二縣貞觀二年廢玉州上元二年復置改爲陸州  
以州界山爲名天寶元年改爲玉山郡乾元元年復爲  
陸州領縣三戶四百九十四口二千六百七十四至京  
師七千二十六里至東都七千里東至廉州界三百里  
南至大海北至思州七百六十二里東南際大海西南  
至當州寧海二百四十里也

烏雷州所治也華清舊玉山縣天寶年改寧  
海舊安海縣至德二年改爲寧海縣也

廉州下 隋合浦郡武德五年置越州領合浦其年置

安昌高城大廉大都五縣貞觀六年置珠池其年改大

都屬白州八年改越州爲姜州十二年廢姜州入封山

東羅蔡龍三縣來屬十二年廢安昌珠池二縣入合浦

廢高城入蔡龍天寶元年改爲合浦郡乾元元年復爲

廉州舊領縣五戶一千五百二十二天寶戶三千三十

二口一萬三千二十九至京師六千五百四十七里至

東都五千八百三十六里東至白州二百里南至羅州

三百五十里西北至南安府一千里北至領州七百里

合浦 漢縣屬合浦郡秦之象郡地吳改爲珠官宋分

置臨邛郡及越州領郡三治於此時西江都護陳伯紹

爲刺史始立州鎮鑿山爲城以威俚獠隋改爲祿州及

爲合州又改爲合浦唐置廉州大海在西南一百六十

里有珠母海郡人採珠之所云合浦也州界有瘴江名

合浦江也 封山 隋縣武德五年置姜州領封山東

羅蔡龍三縣貞觀十年廢州以三縣入廉州 蔡龍



武德五年分置也 大廉 武德五年置四縣皆合浦

縣地

雷州下 隋合浦郡之海康縣武德五年平蕭銑置南  
合州領海康隋康鐵杷椹川四縣貞觀元年改為東合  
州二年改隋康為徐聞縣八年改東合州為雷州天寶  
元年改為海康郡乾元元年復為雷州也舊領縣四戶  
二千四百五十八天寶領縣三戶四千三百二十口二  
萬五百七十二至京師六千五百一十二里至東都五

千九百三十一里東至大海二十里西至大海一百里  
東南至大海十五里西南至大海一百里隔海至崖州  
四百三十里東北及西北與羅州接界

海康 漢徐聞縣地屬合浦郡秦象郡地梁分置南合  
州隋去南字煬帝廢合州置海康縣 遂溪 舊齊鐵

杷椹川二縣後廢改為遂溪也 徐聞 漢縣名隋置

貞觀二年改為徐聞漢志曰合浦郡徐聞南入海達珠

崖郡即此縣

龍州 貞觀十二年清平公李弘節遣龔州大同縣人

龔固興招慰生蠻置龍州天寶元年改為扶南郡乾元元年復為扶州領縣七戶三千六百六十七無四至州縣兩京道里扶南國在日南郡之南海西大島中去日南郡約七千里在林邑國西二千里其王貞觀中遣使朝貢故龍州招置之遙取其名非正扶南國也

武勒 州所治 武禮 羅龍 扶南 龍賴 武觀

武江 皆與州同置

環州下 貞觀十二年清平公李弘節開拓生蠻置環  
州以環國為名天寶元年改為平郡乾元元年復為環  
州領縣八無戶口及兩京道里并四至州府

正平 州所治 福零 龍源 饒勉 思恩 武石

歌良 蒙都 與州同置

德化州 永泰二年四月於安南府西界牂柯南界置

領縣二 德化 歸義 與州同置

郎茫州 永泰二年四月於安南府西界置領縣二

龍然 福守 與州同置

崖州下 隋珠崖郡武德四年平蕭銑置崖州領舍城  
平昌澄邁顏羅臨機五縣貞觀元年置都督府督儋振  
三州其年改為顏城平昌為文昌二年割儋州屬廣府  
五年又置瓊州十三年廢瓊州以臨機萬安三縣來屬  
天寶元年改為珠崖郡乾元元年復為崖州在廣府東  
南舊領縣七戶六千六百四十六天寶戶十一鄉至京  
師七千四百六十里至東都六千三百里廣府東南二

千餘里雷州徐聞縣南舟行渡大海四百二十里達崖  
州漢武帝元封元年遣使自徐聞南入海得大洲東西  
南北方一千里略以為珠崖儋耳二郡民以布單如被  
穿中從頭穿之民種禾稻紵麻女子蠶織無馬與虎有  
牛羊豕雞犬兵則矛盾木弓行矢骨鏃郡縣吏卒多侵  
凌之故率數歲一反昭帝省儋耳併珠崖元帝用賈捐  
之之言乃棄之唐武德初復析珠崖郡置儋瓊振萬安  
五郡於崖州置都督府領之後廢都督隸廣州經略使

後又改隸安南都護府也

舍城

州所治隋舊縣其產儋振瓊萬安五州都在海

中洲之上方千里四面抵海北渡海揚帆一日一夜至

雷州

澄邁

隋縣

文昌

武德五年置平昌縣貞

觀元年改為文昌

儋州下

隋儋耳郡武德五年置儋州領義倫昌化感

恩富羅四縣貞觀元年分昌化置普安天寶元年改為

昌化郡乾元元年復為儋州也舊領縣五戶三千九百

五十六天寶戶三千三百九至京師七千四百四十二里與崖州同在海中洲上東至振州四百里

義倫 本漢儋耳郡城即此縣隋為義倫縣州所治也  
昌化 隋縣 感恩 洛場 新置 富羅 隋之毗善縣武德五年改置

瓊州 本隋珠崖郡之瓊山縣貞觀五年置瓊州領瓊山萬安二縣其年又割崖臨機來屬十三年廢瓊州以屬崖州尋復置瓊州領曾口樂會顏羅五縣天寶元年



改為瓊山郡乾元元年復為瓊州貞元五年十月嶺南  
節度使李復奏曰瓊州本隸廣府管內乾封年山洞草  
賊反叛遂茲淪陷至今一百餘年臣合判官姜孟京崖  
州刺史張少逸併力討除今已收復舊城且令降人權  
立城相保以瓊州控壓賊洞請昇為下都督府加瓊崖  
振儋萬等五州招討遊奕使其崖州都督請停從之領  
縣五戶六百四十九兩京與崖州道里相類西南至振  
州四百五十里與崖州同在大海中也

瓊山 州所治貞元七年十一月省容瓊縣併入 臨

高 本屬崖州貞觀七年割屬瓊州 曾口 樂會

顏羅 後漸析置

振州 隋臨振郡武德五年置振州天寶元年改為臨

振郡乾元元年復為振州也領縣四戶八百一十九口

二千八百二十一至京師八千六百六里至東都七千

七百九十七里東至萬安州陵水縣一百六十里南至

大海西北至儋州四百二十里北至瓊州四百五十里

東南至大海二十七里西南至大海千里西北至延德  
縣九十里與崖州同在大海洲中

寧遠 州所治隋舊 延德 隋縣 吉陽 貞觀二

年分延德置 臨川 隋縣 范屯 新置

萬安州 與崖州同在大海洲中唐置萬安州失起置  
年月天寶元年改為萬安郡至德二年改為萬全郡乾  
元元年復為萬安州領縣四無戶口西接振州界兩京  
道里與振州相類也

萬安州所治至德二年改為萬全後復置陵水

富雲博遼與州同置

赤土國州南渡海便風十四日至鷄籠島即至其國

赤海中之一洲

丹丹國振州東南海中之一洲舟行十日至

舊唐書卷四十一

舊唐書卷四十一考證

地理志四綿州鹽泉縣鹽泉武德三年分涪城置○新書析魏城置

綿州西昌縣本隋金山縣隋末廢○沈炳震曰按金山武德七年廢非隋末也

閬州○舊書屬劍南道新書屬山南西道

果州○舊書屬劍南道新書屬山南西道

普州宗龕縣宗龕後周隆龕城○新書作龍龕

邛州顯慶三年移州治于臨邛○新書作二年

雅州儀鳳四年置飛越大渡二縣○新書作二年置大渡縣長安二年省

黎州飛越縣儀鳳四年分漢源于飛越水置縣○新書作二年

翼州○沈炳震曰舊書領衛山翼水雞川昭德四縣無  
戎和新書領衛山翼水戎和三縣無雞川昭德互異  
維州○沈炳震曰舊書領薛城小封二縣新書有薛城

通化歸化三縣通化即小封後更名者惟多歸化一縣

黎州○沈炳震曰此州祇領梁水絳二縣與前黎州領漢源飛越通望三縣兼統制五十四羈縻州者大小迥別蓋名同而地各異者也

姚州國忠命鮮于仲通興師十萬渡瀘討之大爲羅鳳所敗○沈炳震曰按本文下云鎮蜀蠻帥異牟尋歸國遂以韋臯爲雲南安撫大使事與文不相聯屬蓋

闕文也

靜州○領悉唐靜居二縣新書多清道一縣

柘州○闕戶口領縣

保州○領定廉歸順雲山三縣新書多安居一縣

真州○領真符雞川昭德三縣新書多昭遠一縣

霸州○止領信安一縣新書領安信牙利保寧歸化四

縣而信安又作安信互異二志未知孰是

以上劍南道

韶州仁化湏昌二縣天寶後新置○新書光宅元年析



始興置

臣德潛

按嶺南道中韶州後應及潮州舊書

闕

康州武德四年置康州○新書作六年

瀧州建水縣新置○沈炳震曰新書武德五年曰永寧  
天寶元年更名建水是合二縣爲一故領縣四也舊  
書各爲一縣故領縣五

高州隋高梁郡○新書作高涼

保定縣舊保安縣至德二年改爲保定○新書本連江

開元五年曰保寧至德二載改据通鑑當從舊書

藤州領鍾津感義義昌三縣○新書多寧風一縣

富州馬江縣隋開江縣長慶元年改爲馬江○新書作  
長慶三年

貞觀中置鬱林州○新書麟德二年析貴州之石南興  
德鬱平置

平琴州○即新書黨州建中二年併入者也新書多撫  
安善勞善文寧仁四縣

澄州領上林無虞賀水三縣○新書多止戈一縣

貞觀六年改爲邕州○新書八年更名

貞觀元年改爲容州○新書作貞觀八年

白州龍豪縣武德四年析合浦置○新書龍豪屬順州  
禺州扶桑縣武德四年置○新書作扶萊以扶萊水名  
之應從新書

愛州又分隆安立教山建道都掘三縣○都掘新書作  
都握

福祿州領柔遠一縣○新書多唐林福祿二縣以上嶺南道

舊唐書卷四十一考證

謹案第七頁前八行魏城刊本訛魏成據新書改  
第十四頁後七行資中牛鞞墊江三縣地刊本墊  
訛蟄據新書改

第二十四頁後六行蓬口州刊本脫口字據新書  
增

第二十九頁前六行漢縣虎縣地刊本虎訛虎據漢  
書地理志改

第二十九頁前七行玉壘山刊本壘訛疊據漢書

地理志改

第三十六頁前六行鬐州下刊本鬐訛鬐據新書  
改

第三十七頁前六行揚被刊本訛揚彼據新書改  
第三十七頁後一行宋州武德四年置西宋州按  
新書宋並作宗與此異

第三十七頁後八行古滇王國刊本滇訛滇據史  
記西南夷傳改

第三十八頁前五而治於弄棟刊本棟訛棟據  
漢書地理志改

第四十四頁後五行六行領悉唐左封識曰三縣  
刊本白訛曰據新書改

第四十七頁前七行天寶八年按是時已改年為  
載此仍作年係傳寫之誤

第四十九頁前二行劍具刊本作斂貝據新書改  
第六十頁後一行漢臨允縣刊本允訛元據漢書

地理志改

第六十六頁前二行三行領龍城安義連城義城  
四縣刊本四縣訛四年今改





總校官庶吉士臣侍朝

校對官中書臣馮培

騰錄監生臣張孝基